

東  
華  
續  
錄

東華續錄

臣周倫蕃恭校

秋七月辛卯朔諭劉統勳等審訊郭一裕與恆文商量貢金一摺  
恆文身為總督乃借貢獻為名縱其慾壑見據查出贓私累累應  
俟各案審明按律治罪至郭一裕先以貢金慾恣恆文並呈示式  
據後見閩省喧傳乃先發制人冀立身於不敗迹其所供行險取  
巧情狀一一畢露伊本屬小器前於山東巡撫任內陛見時曾面  
奏臣家計本足自給且久歷外任願進銀一萬兩為工程之用朕  
聽之駭然深斥責其非因一時未得其人未即更易今觀其先購  
金置鎗備進其病根深錮是以隨處發露耳且其購金亦委之司  
道卽云照數發價而以司道大員供督撫私役閩省趨風成何政

體國家設官分職之義固如是乎郭一裕深負封疆之寄著解任來京候旨外人無知者或謂恆文係滿洲郭一裕以漢人參奏滿洲是以兩敗俱傷此則鄙謬大不知朕心朕自登極以來滿漢從無歧視此案審定時必辦理至公至當允愜其心况從前皇祖時張伯行糾劾噶禮經大臣審訊誣坐張伯行皇祖察知其實重治噶禮之罪而張伯行任用如故此家法也但郭一裕爲人非張伯行比耳至納世通沈嘉徵身居藩臬原許其具摺奏事遇督撫有此等事卽應據實陳奏乃並匿不以聞惟事迎合上司毫不知愧何以爲屬僚表率納世通沈嘉徵著交部嚴加議處具奏尋議上得旨納世通沈嘉徵俱照部議革職○諭嘉峪關外路多戈壁從前並無水泉今年大兵經過鑿井之處俱得甘泉水勢騰涌普濟軍行不特所過駝馬汲飲有資卽往來商賈亦多利賴此實

神明贊佑所致昔年 皇祖用兵時地湧靈泉曾於托里地方建廟以答神庥今卽照此例交該督敬謹建造該部遵行具議以聞尋黃廷桂遵部議覆奏查嘉峪關外由安西至哈密中有得勝墩地方係戈壁之首平坦空曠應於此擇爽塏處建造且就近安西歲時祭享亦便從之○停止河南本年漕運○壬辰以劉藻爲雲南巡撫調富勒渾爲湖北布政使以杜官德爲浙江布政使吳嗣爵爲江蘇按察使由淮揚河道遷○以傅靖爲雲南布政使由浙江河道遷吳紹詩爲雲南按察使由貴州糧道遷○甲午命河南疏濬溝塍代賑○乙未命河南水災地方例賑折價外每石加銀一錢○免徵河南被災地方本年漕項○永貴奏扎哈沁叛賊巴哈曼集恃險立寨副都統額勒登額等雖收其牲隻一時不能攻取續經將軍兆惠派巴圖魯侍衛奎瑪岱等分剿並令拏獲之厄魯特屬人持書諭降額

勒登額等將博囉通古之賊眾勦殺又問明拏獲之人係隨扎哈  
沁收楞額占布前來見據山險因令持書往諭占布不從隨即覓  
路逃竄又捉生訊問巴哈曼集同四得沁帶三百戶口越嶺而逃  
至衛和勒津暫住欲往克喀特烏魯特等鄂拓克去隨派總管端  
濟布接應奎瑪岱尋蹤追勦並行文將軍成衮扎布侍衛烏勒登  
等協同截堵報聞○丙申諭向來直省遇有偏災本邑正佐不敷  
分辦例委鄰封州縣及佐雜試用等官協同查辦原期體察周詳  
勿致遺漏乃委員往往以例無處分事非切己不過扶同具結虛  
應故事甚非差委本意委員既經派遣則承辦皆分內之事自應  
與地方官功過一體嗣後委員內如有查災不據實結報辦賑不  
實心挨查草率從事仍前玩忽者該督撫查明題參照地方官查  
辦災賑不實一體處分著爲例○命江西北酌撥糧石於河南

備賑○丁酉命河南各關免徵米稅○戊戌諭翰林院所撰致仕大學士福敏碑文殊屬平庸浮泛明廷著作當以典雅親切爲尙若沿襲舊文虛詞敷衍易一姓名皆可通用矣向來翰林文字多有此病其在無可稱述之輩循例予卹者固亦無足深論至大學士福敏則朕受業之師也人品學問巋然爲國家耆碩朕尙當親製碑文以光節終之典詎可以雷同膚廓之語塞乃責耶謝墉卽未諳體裁該掌院蔣溥德通謝墉俱著交部察議○革原任河南語德通所司何事蔣溥德通謝墉俱著交部察議○革原任河南巡撫圖爾炳阿職發往烏里雅蘇台軍營辦理糧餉事務○癸卯諭彭家屏前以收藏明末野史其有無批評之處已被伊子燒毀滅迹經軍機大臣會同九卿審擬斬決具奏朕以罪疑惟輕特降諭旨改爲監候秋後處決嗣據圖爾炳阿奏其所刻族譜取名大

彭統記甚屬狂妄等語因命新調巡撫胡寶琮查取呈進則以大彭得姓之始本於黃帝昌意顓頊夫氏族譜系士大夫家恆有之亦何至附會荒遠以爲迢迢華胄乃身爲臣庶而牽引上古得姓之初自居帝王苗裔其意何居且以大彭統記命名尤屬悖謬不幾與累朝國號同一稱謂乎至閱其譜刻於乾隆甲子年而凡遇明神宗年號於朕御名皆不闕筆朕自卽位以來從未以犯朕御諱罪人但伊歷任大員非新進小臣及草野樵陋者可比其心實不可問足見目無君上爲人類中所不可容而前此之逆書天理昭彰不容其漏網明甚彭家屏原係應斬立決之犯卽秋審時亦必予勾著從寬免其肆市卽賜令自盡以爲人臣之負恩狂悖者戒○諭今日召見陳宏謀詢及各省水災據奏皆因上游爲眾水所匯而下游無所歸宿必當會同通盤籌辦方爲有益等語其言

頗中肯綮江南山東河南壤地相接數年以來頻罹水患而今年爲最朕早見及此於閱河時卽已諄切訓諭並分命欽差及督撫河臣相度籌辦而時已首夏不及措施竣事者荆山橋上下百餘里及清河積水而已豫兗之境則被災之地較廣人戶田廬待撫恤者不下數十州縣南望爲之惄然傷懷轉瞬秋冬正工作可施之候若不先事而亟圖之徒坐視其年復一年橫流四出直至臨時張皇補苴何所底止耶山東之水匯於淮徐河南之水達於鳳潁該督撫等雖各守封疆要不得各分畛域况此嗷嗷災黎皆朕赤子大臣公忠體國之謂何而忍稍存分別之見乎在今日言之會三省之全局而川潯以疏之隄防以禦之工費誠屬浩繁然一舉而使千百里內之田疇民舍可以永獲安全則生民之利孰大於是卽多需帑金所不當惜况統屢年賑恤所用計之爲數果孰



多孰寡耶在國家蠲賑未嘗不動盈數百巨萬而小民已先受蕩  
析之苦即使爲督撫者皆能體朕愛民之心郡縣之吏又悉良有  
司撫恤極其周經理極其善而災黎所得日纔以升合計度命而  
已何如無災而得中歲蓋藏稍裕之爲能自樂其生耶且水非旱  
比赤地千里待澤土蒼非人力所及有吁嗟籲禱而已水則治之  
專藉人工所難者治之當得要領及任事當求忠實勇往之大臣  
耳前曾以此諄切傳諭尹繼善伊於地方情形非不熟悉其才力  
亦非不能辦此特惜費省事之意膠固於胸中而又惟恐辦之或  
無成效動曰地處窪下卽治之亦不能保其不被水患夫治之而  
仍受水患此皆未得治之道耳豈終不可治耶乃以是藉口而  
委之不治是正因噎而廢食矣爲地方興大利除大害詎可沾沾  
爲一身功過計是豈朕委任意耶江蘇巡撫陳宏謀安徽巡撫高

晉山東巡撫鶴年河南巡撫胡寶琮等皆能任事之大臣所有三省積年被水之由應如何相度形勢從長計議俾可永弭水患之處著該撫等各於所屬境內悉心查勘仍復彼此會同詳籌妥辦侍郎裘曰修夢麟往來查閱隨時商酌其有應會兩總河者亦著會閱詳議陳宏謀著卽由河南歸德一路前赴蘇州沿途逐一先行審視與高晉等會奏請旨諸臣膺茲委寄務各矢實心和衷共濟以慰朕念切民依宵旰憂勞之至意尋夢麟尹繼善白鍾山嵇璜陳宏謀等會奏通籌湖河宣導機宜竊惟淮徐海地方水患頻仍必須源委並治如山東與江南接壤之南陽昭陽微山等湖積水亟宜設法宣洩在山東見另行籌開伊家河至梁旺城入運江南運道各開越河再加開展挑濬惟因沂水自盧口旁洩由沙家徐塘二口入運過多有阻微山湖水經行之路臣等親往會勘緣

舊壩口門寬至八十丈且年久刷深致多旁溢亟宜籌辦第沂水來源甚大未能遽行堵閉擬將石壩裏頭接長止留口門寬三十丈並築碎石壩底以爲節制使沂水過半歸湖止留二三分濟運但目下運河惟患壅滯無需接濟應於盧口接草壩將沂水堵截使不得入運其邳境沂河尙屬寬深酌加疏濬兩岸土堰培修使正流暢入駱馬湖由六塘河歸海俾運河宣洩微山湖水得以全力下注可望速消至荆山河原係宣洩湖水要路蒙指示於小梁山等處開挑引河並於荆山橋上下及出水湖口再加疏濬務期暢流入運其彭家河另摺奏請開挑此籌酌微山等湖宣導入海之情形也又勘得六塘河處駱馬湖下游爲宣洩沂水要道駱馬湖尾閘有引河五道甚寬暢自引河以下匯爲一河形勢窄狹急宜開寬並將永濟橋酌添十二孔俾湖水暢注其六塘河內如有

淤淺及舊堰殘缺修浚培補又六塘河北岸宿遷境內浚溝地方向有水口注沐河入連歸海盛漲時淹浸民田擬就見有河路開挑寬深仍於浚溝建滾壩又桃源境內有港河一道亦係分洩六塘河會沐入連歸海年久淤淺應挑濬亦於河頭建築滾壩並將沐河舊堰修補使六塘河有分洩之支至六塘河下尾在海州地方與鹽河交匯由武障等河歸海口門閘有淺阻俱加疏濬並將鹽河加挑寬深見有之洩水各壩減低二尺其例應商辦者仍歸商辦臣等派官監督其義澤河下游舊有小沖河一道應疏濬深通又東門白蜆牛墩六里等河由六道溝匯入北潮河與武障武澤同歸一路未免壅阻今查東門河下游見有五道河形應開挑俾下游多一入海之路此籌酌六塘河分導沂水入海之情形也再河南夏邑永城等縣之水向由睢河下注江南之泗山等湖經

安河入洪澤湖出清口會黃入海近多淤阻經臣裘曰修高晉會勘另摺奏請開濬內有烏鴉嶺安河董家溝等工係下江宿遷桃源所管見委員確估趕辦惟各水多歸洪澤則出口務須宣暢查清口之束水二壩業蒙指示汛前早行拆卸自當長遠遵守其裴家廠張福莊等處引河水落後如有淤淺並加疏濬此籌酌睢河入湖並湖水入海之情形也以上應開各河道或因舊河淺窄加挑寬深或因來源寬廣添籌去路皆係上接鄰省下鄰數郡之幹河所當首先興舉其餘一州一邑山泉坡水匯而成河者如碭山之利民溝永定溝豐縣之食城河蕭縣之歐邵河爛石河銅山之奎河房亭河睢甯之沈家河白山河邳州之武河燕子河艾山河宿遷之北岸民便河蔡家閘引河羅家河桃源之姜胡窪河清河縣之包家河民便郭家河周橋河山陽之十字河太平河烏沙河

安東之民便河舊鹽河阜甯之穿里河戴家溝河海州之高墟口  
王官口丁家溝等河沐陽之分水沙河以上均係支流見多淤墊  
臣等詳加斟酌有必須通身開挑者有止須開段疏濬者有添設  
開洞者覓督率道府帶熟諳人員分段確估興挑臣等往來督查  
限年內告成以期積水全消及時布種得旨覽奏頗得領要但須  
諸臣無分彼此和衷共濟以慰朕南顧之憂仍須實力督催不可  
草率塞責其共勉之裘曰修胡寶琮等奏會勘豫省水道籌辦疏  
濬事宜查黃河以南鞏縣以上伊洛瀘澗俱入於黃無庸置議自  
滎澤以下北阻大隄南則連山橫亘諸水所經惟以正東及東南  
兩面爲去路正東則上江宿州之睢河向因砂礮灘徐溪口等處  
梗塞致水無出路此商虞夏永四邑頻年被水之由也東南則以  
江南潁州府屬各州縣爲出路淮之大本能宣洩而兩省接壤處

淺阻實多豫省之水壅遏則豫省受其患繼之奔潰四溢患且及上江從此開隙迤下及於柘城鹿邑汝甯迤下及於西平上蔡頻年被水之由也今睢河沙礪一帶奏請興挑則東面之去路可冀無阻矣潁毫一帶臣等會同安徽撫臣高晉與潁州各地方官細加審勘則東南一面之去路可冀無阻矣而後諸水之在中州者可得而治也臣等採訪相度惟有先開幹河爲受水之地繼開支河以引入幹河繼開溝洫以引入支河分別要工次工緩工爲興修次第東面之幹河在商邱則爲豐樂河在夏邑則爲響河在永城則爲巴河其實一河而旁受惠民溝畦鄰溝毛家河虬龍溝歧河民便河諸水河身旣窄加以年久淤墊深不過四五尺此亟宜大加挑治者也東南一面之幹河以大沙河爲大卽古潁水也發源於汝州之魯山自許州陳州會東西兩蔡河經項城沈邱入江

南太和境長三百餘里河流深通無庸疏濬隄岸有殘缺處勘明補築其他則開封之賈魯河卽古之汴水發源於滎陽之大周山經鄭州中牟祥符至朱仙鎮山尉氏之夾河至扶溝受溱洧二水經西華合潁汝二水經商水縣逕周家口入於大沙河至潁州之太和境注於淮朱仙鎮以上無庸置議尉氏以下周家口以上則宜一律挑濬以廣爲宣洩者也又惠濟河則自中牟經祥符陳留杞縣睢州柘城鹿邑入亳州之懷家溜以達於淮杞縣以下淤阻尤甚此幹河之當濬者又其一又渦河則發源於通許之胥岡至陳州爲燕城河受鐵裏河七里河舊黃河諸水亦經柘城鹿邑入亳州之安家溜以達於淮下游淤阻自鹿邑以上漫口甚多今歲受患尤甚此幹河之當濬者又其一懷家溜安家溜二處下有砂礪均須開鑿此外如永城之漕溝夏邑之毛家河小引溝觀音閣



引河白河三汊河虞城之惠民溝商邱之北沙河大湖溝鹿邑之清水河汝甯府之洪河汝河均有窄淺處亦應開濬至與上江接壤之三河尖兩河口茨河明河等處皆應兩省委員協辦挑河之士加幫隄岸仍於河身最窄不能開寬及沙鬆溜急之處普加夯礮以資捍禦臣胡寶瑑見委員分頭勘估迅速興工並審度地宜多設涵洞俾隄內之水外洩於河至舊有溝渠自應槩行疏治臣胡寶瑑更擬倣古溝洫之制多開橫直小溝作為水道卽酌用民力咸所樂從其中儻有工費稍鉅請酌照疏消積水之例量給飯錢乞去地畝俟溝洫辦有成效覈實請豁又歸德所屬有遠年古窪原係瀦水之區偶因水涸愚民占作地畝復因爭訟遂報升科其實歲歲報災無可疏治臣等擬仍捐爲瀦水之區見飭該府縣查明課則詳覈清豁臣等通盤籌算由引河以達於支河由支河

以達於幹河其不能歸河者於田間多作溝渠以爲導引或窪地聽爲藪澤以資停蓄總使源源之水順下無阻而野潦亦有所約束不致漫溢則一切水道治矣所有籌辦緣由見移咨侍郎夢麟暨江南山東督撫河臣再加確覈臣胡寶琮卽督飭委員速估造冊另行繪圖貼說具奏得旨好如所議速行務在明年雨行之前畢工方妥仍應爲之以實不然責有攸歸又奏臣等酌議幹河列爲要工支河引河爲次工溝渠爲緩功要功於歲內全完次工於來歲四月報竣緩工則陸續辦理以一歲爲期至有下游應須先辦雖支河引河仍應列爲要工者俟統估冊內聲明得旨此不然以一歲爲期明年雨行豈不仍泛漲乎當於要工完後卽從事方妥○丙午諭尹繼善奏酌籌沛縣疏洩事宜一摺內稱山東湖口閘與韓莊閘相近雖爲蓄水濟運實亦洩水尾閘而該閘僅寬丈

餘不足宣洩又沂河自北而南流入駱馬湖近因水大於邳州之  
盧口向西散漫入運與荆山橋洩下之水相阻以致不能通暢皆  
爲沛縣受病之由等語尹繼善此言頗中近日形勢而沂水不使  
入運尤爲切要蓋諸湖向以濟運而近年運河之水不患其少惟  
患其多良由橫決之水散漫入湖以致湖不能容溢而入運運益  
不能容併爲巨浸運艘阻滯旁邑爲災皆緣於此不可不亟爲籌  
辦其應如何設法堵築使沂水各歸駱馬湖及湖口一閘應如何  
添建滾壩俾得暢爲宣洩而不致橫流微山入運之處著該督等  
通盤詳加勘閱繪圖具議以聞朕昨經降旨交陳宏謀高晉鶴年  
胡寶琮等四人經理河務裘曰修夢麟往來相度其尹繼善原係  
該省總督白鍾山張師載身任總河事均一體此九人者當合爲  
一人庶克有濟今歲黃河順軌中泓刷汕較前深通實爲上蒼庥

佑但荆山橋一帶仍須廣爲疏通要知此橋如許空洞皆應過水若如今歲經由時情景則俱爲虛設矣此事仍須責成夢麟令再加開濬總之尾閘多宣洩一分則上游少一分灌浸朕於河務一事宵旰廬念諸臣務宜共體朕懷協力同心和衷集事以副朕委任至意○兆惠奏臣至額密勒西岸准富德咨稱探知阿逆在額布克特地方賊眾約七百餘人隨遣奇徹布達禮善努三等領兵前進身率羅布藏多爾濟愛隆阿圖倫楚等隨往五月初一日至彼探知阿逆已遁遂分兵向塔爾巴哈台追躡見有遊牧蹤迹捉生詢問知係叛逆巴雅爾所在逃去已三日因尋蹤深入至塔爾巴哈台山後極險處奇徹布等截賊去路羅卜藏多爾濟從東攻入奪險五處夜半時巴雅爾帶眷屬五十人逃出因令奇徹布等追擒而暫留剿洗餘黨收取馬駝亦卽前進二十八日驍騎校賚

札木蘇擒獲巴雅爾之子塔喇巴勒六月初三日愛隆阿報知奇徹布陣亡卽帶兵至愛呼斯分兵協助圖倫楚達禮善占頗圖海蘭察等兩路按尋仍帶兵前往山梁堵截巴雅爾被海蘭察追及射中其肘占頗圖射中其脛始就擒並獲其妻妹二子問以阿逆及哈薩克錫喇所在堅稱不知謹派侍衛額勒登額等將巴雅爾馳驛解京得旨富德著授爲內大臣賞給世職貝勒羅卜藏多爾濟封爲郡王額爾克沙喇封爲公副都統愛隆阿交部議敘侍衛努三授爲頭等侍衛首擒巴雅爾之海蘭察其次占頗圖俱授爲三等侍衛海蘭察賜號額爾克巴圖魯占頗圖賜號塔蘇爾海巴圖魯各賞銀一百兩其藍翎侍衛額勒登額等俱交部議敘陣亡之侍衛奇徹布察例加倍優卹伊子富珠隆阿以頭等輕車都尉世襲在三等侍衛上行走又奏准富德咨稱貝勒羅卜藏多爾濟

等追賊巴雅爾五月三十日至愛登蘇遇賊五十餘人突出拒敵  
侍衛奇徹布中鳥槍陣亡賊已敗回又來賊二百餘廛戰數次復  
有賊眾舉瑪尼纛四桿排立遣人止戰問係何兵答以天朝征準  
噶爾巴雅爾至此遂遣人來告云我等係哈薩克阿布賚屬下阿  
布賚遣伊弟阿布勒比斯使擾厄魯特遊牧並令如遇大國之兵  
卽出去歲將軍所發印文爲據以求歸附適因倉卒不知是以拒  
戰我等卽退兵告知阿布賚約於五日內遣人來見將軍參贊等  
語六月初三日巴雅爾旣擒適哈薩克得木齊和托圭達木等到  
營問係阿布勒比斯等問安請罪並獻馬二匹告稱我兵原不敢  
擅動止因阿睦爾撒納去歲逃來大國遣人索取沿邊居人未卽  
達知阿布賚是以煩大皇帝征討阿布賚欲將阿賊擒獻先爲  
所覺盜馬逸去近聞厄魯特潰散欲乘閒取其貨物不期猝遇大

兵致彼此傷損今特獻馬請罪儻阿賊入我境必行擒送如將軍  
參贊遣人往見阿布賚必遣人請罪並懇帶兵效力以圖往來交  
易等語看其言詞恭順隨遣參領達里庫等十一人同往宣諭威  
德阿布賚因願以哈薩克全部歸順隨具表文並進馬四匹遣使  
亨集噶爾等七人入覲又遣使送馬云爲臣等賀禮富德仍約與  
阿布賚相見來使云阿布賚已帶兵巡查遊牧如欲知哈薩克全  
部懇遣大員前往會同阿布賚查明具奏臣至富德軍營撫慰來  
使遣達里庫等伴送入京又遣台吉額爾克沙喇侍衛努三等攜  
段匹禮物答賀臣等復對使人申明利害諭以擒獻阿逆並屬額  
爾克沙喇等見阿布賚時獎其恭順促擒逆賊至查辦各部落但  
就情願歸附者偕來不必相強若言及貿易則告以軍營向無商  
販須豫指處所約定時日以便招商備辦阿布賚如求入厄魯特

遊牧則告以疆界不可踰越萬難聽許伏思哈薩克遠慕德威歸順屬實儻阿逆仍入其境或可得協擒之力否則臣等亦必深入務期擒獲謹將阿布賚所進托忒字表文錄副馳奏下部知之○丁未諭閩浙總督喀爾吉善品行端重練達老成久任封疆勤勞懋著前聞偶患熱痘特命伊子定敏同御醫馳驛前往診視並賜薄餌以冀速痊乃計程尚未到閩遽爾溘逝朕心深切軫悼喀爾吉善著入祀賢良祠以昭眷念賢臣之意所有應得卹典著該部查例具奏尋予全葬入祠致祭諡莊恪○諭定邊右副將軍兆惠參贊大臣富德奏稱哈薩克汗阿布賚悔過投誠稱臣入貢遣使至營情辭懇切見在護送進京等語哈薩克一部素爲諸厄魯特所畏去歲叛賊阿睦爾撒納逃竄往投我師追擒直入其境阿布賚率其部落遠徙數千里旋欲縛獻阿睦爾撒納以贖前愆爲阿



睦爾撒納所覺遂遁回準噶爾乘噶勒藏多爾濟巴雅爾等滋事之際復肆鴟張及大軍復入伊犁時噶勒藏多爾濟已爲其姪扎那噶爾布所害而扎那噶爾布又爲阿睦爾撒納所襲今兆惠宮德等率師進勦見將叛賊巴雅爾及其妻子部眾悉行擒獲則阿睦爾撒納釜底遊魂其能久逃斧鉞耶況叛賊之所以虛張聲勢煽惑諸厄魯特及回子等眾者惟恃一哈薩克耳茲阿布賚旣已請降約以阿睦爾撒納如入其地必擒縛以獻則叛賊失其所恃技無所施此一大關鍵也朕心實爲之慶慰哈薩克卽大宛也自古不通中國昔漢武帝窮極兵力僅得其馬以歸史冊所傳便爲宣威絕域茲乃率其全部傾心內屬此皆上蒼之福佑列祖之鴻庥以成我大清中外一統之盛非人力所能與也然外間無知者流必又謂其不可深信又以阿睦爾撒納巴雅爾等來臣復

叛勞師費帑至今未已爲詞不知哈薩克越在萬里之外荒遠寥廓今未嘗遣使招徠乃稱臣奉書貢獻馬匹自出所願所謂歸斯受之不過羈縻服屬如安南琉球暹羅諸國俾通天朝聲教而已並非欲郡縣其地張官置吏亦非如喀爾喀之分旗編設佐領卽準噶爾初歸時亦不過欲分爲四衛拉特令自爲理朕前作太學碑文已具見大意而伊等自外生成屢爲不靖亦準噶爾諸部之貪殘狡詐惡貫滿盈獲罪於天合有此一番殺劫不能承受太平之福且旣已受號稱臣豈容置之不問朕亦惟奉天以行耳哈薩克自非準噶爾近接西陲之比也若謂準噶爾之事本不當辦則尤不知事理之言夫編氓子孫尙以析薪負荷肯堂肯構爲克承先志況以兩朝未竟之緒而適值可乘之機乃安坐而失之使天下後世傳爲遺憾則朕亦何以上對皇祖皇考在天之

靈耶況如阿睦爾撒納來時若拒而不納伊其肯甘心返轡耶亦必蹂躪我喀爾喀廢其劫掠而後已耳從前所降諭旨甚明乃今春南巡時有江南監生張汝霖浙江訓導章知鄴於妄請從軍摺內有損兵折將之語夫草茅微賤之人謬信傳聞本不足論然此等妄徒何嘗有忠君愛國之心不過逞幸災樂禍之口而天下之大其無知而造言者可見正復不少我兵自前次平定伊犁以來未嘗不屢有勦殺非所謂驅之鋒鏑之閒使膏塗野草而不恤也且定從古不入版圖之地於三五年之閒此亦神且速矣而能保其必無一二受傷之人耶至所用之兵皆我八旗索倫子弟之眾並未嘗徵發閭左調集耕甿如杜甫所哀垂老無家新婚之爲也見在軍需所計較之雍正年閒纔及十之三四而各省偏災之賑恤動逾數百萬外此河工之動撥宿逋之蠲免戎行之經費與一

切實賚賜予何嘗因此而少有減省且視昔轉有所加焉較之前代以用兵而增稅捐俸者爲何如耶朕初非惡逸好勞窮兵黷武必以此事侈誇遠略也特以國家大事無過於此而因勢乘便正爲長顧永慮息事甯人之計若以光武之不納鄯善車師以爲人君盛節不知彼時內亂尙未靖安有餘力顧彼若可爲之時光武亦必爲之而可與本朝全盛之時相提並論耶總之阿睦爾撒納一日不獲則邊陲一日不甯而阿布賚旣降則阿睦爾撒納不患其不獲阿睦爾撒納旣獲則準噶爾全局可以從此奏功矣著將哈薩克汗阿布賚降表繙譯宣布中外並將此通行曉諭知之表文曰哈薩克小汗臣阿布賚謹奏中國 大皇帝御前自臣祖額什木汗揚吉爾汗以來從未得通中國聲教今祇奉 大皇帝諭旨加恩邊末部落臣暨臣屬靡不歡忭感慕 皇仁臣阿布賚願

率哈薩克全部歸於鴻化永爲中國臣僕伏惟中國大皇帝睿  
鑒謹遣頭目七人及隨役共十一人齎捧表文恭請萬安並敬備  
馬匹進獻謹奏○諭哈薩克汗阿布賚曰朕爲天下共主中外一  
體爾哈薩克爲準噶爾所隔未通貢使茲以大兵平定準部率屬  
歸誠朕深鑒悉據將軍等奏爾旣歸降應加封號並查明游牧朕  
謂不必過拘爾等僻處遐方非可與喀爾喀諸部比爾稱號爲汗  
朕卽加封無以過此或爾因係自稱欲朕賜以封號亦待來奏惟  
期爾部安居樂業俾游牧各仍舊俗卽貢獻亦從爾便如遣使入  
覲朕自優加賞賚至阿睦爾撒納負恩叛亂誘爾部眾以致游牧  
不安將軍等奏爾所言如逆賊等逃入境內卽當擒獻朕深信之  
爾今旣向化歸誠則當知準噶爾全部悉我疆域宜謹守本境勿  
闖入侵擾惟我軍凱旋後厄魯特等或閒有率游牧竄入爾境者

爾縛獻首惡而收其屬人尙屬可行茲因爾使入覲還歸尙需時  
日先由驛遞馳諭並賜爾大段四端蟒段二端爾其欽遵朕訓永  
受無窮之福特諭○諭軍機大臣等兆惠等已擒獲巴雅爾而逆  
賊阿睦爾撒納及扎那噶爾布尼瑪巴圖爾烏巴什哈薩克錫喇  
等尙在逋逃計此數賊力量已窮惟竄伏山谷以延時日著傳諭  
兩路將軍若將扎那噶爾布等賊俱擒而阿逆尙未獲則以兩路  
得勝之兵如行圍之中軍驍相對捲回使無地可匿昨據兆惠等  
奏恐阿逆竄入俄羅斯因派兵堵截此固豫防之善策若竟料其  
竄入遂生怠心則大不可朕意賊人若潛伏僻處候我撤兵再出  
嘯聚則用兵何時可已此時兩路軍營須速以擒賊爲事卽屆撤  
兵之時止應於濟爾哈朗等處擇地駐紮臨期再行具奏不可卽  
使兵眾知之以致觀望不前也○調楊應琚爲閩浙總督以鶴年

爲兩廣總督蔣洲爲山東巡撫塔永甯爲山西巡撫蘇崇阿爲山

西布政使亢保爲江西按察使

由江蘇常鎮道遷

○以吳士功爲陝西布

政使和其衷爲湖北按察使

由江西豐道遷

○皇十四子永璐生○戊

申

上奉

皇太后啓鑾秋獮木蘭○免經過地方本年額賦十

分之三○成衮扎布等奏臣等遣沙喇斯宰桑三都克往拏瑪呼

斯宰桑多爾濟未回因帶兵前往辦理六月二十九日三都克遣

屬人並拏獲兩和卓木之奸細阿布都爾滿前來次日三都克到

軍營告稱多爾濟已逃見派兵追拏又聞兩和卓木已聚兵豫備

我等遊牧與彼相近移於阿勒輝外吐魯番內傍塔石干山之地

過冬今帶馬百匹助大兵之用等語查三都克自入覲回營節次

差遣事件皆伊屬人前往今雖未拏獲多爾濟而業與回部有隙

明年進剿時令爲前隊可得其力請遵前旨將三都克授總管職

銜分管沙喇斯人眾其瑪呼斯部落願與沙喇斯一同內移臣等  
查看情形酌辦復訊問阿布都爾瑞據供布拉呢敦見居喀什噶  
爾地方霍集占帶兵七千見居阿克蘇地方因五月閒厄魯特錫  
克錫爾格敗逃恐大兵進剿豫謀防守其前遣之副都統阿敏道  
與兵丁百人皆爲所害嚴禁屬人不許洩漏等語謹將霍集占送  
吐魯番文書譯出呈覽報聞○辛亥成衮扎布等奏臣等令侍衛  
烏勒登副都統三格等往擒扎那噶爾布副都統職銜由屯貝勒  
旺布多爾濟等往擒尼瑪據由屯等報稱七月初一日行至哈什  
河拏獲尼瑪屬人都噶爾扎布作爲嚮導次日至哈什河之阿爾  
察圖山口見賊蹤迹分兵兩翼乘勢攻擊賊遂奔潰因追殺二百  
餘將尼瑪及伊子擒獲其妻女及屬下台吉等俱中箭身死收取  
人口什物馬駝隨訊問尼瑪扎那噶爾布所在據供稱扎那噶爾



布於六月中旬與呼爾璘台吉達瓦布魯古特台吉璉齊等相惡  
已被擒獲因其出痘頗重尙未解送等語適三格等兵到遂告知  
令其速進仍令都噶爾扎布前導等語臣等俟尼瑪解到派員解  
京其眷屬卽行正法諭軍機大臣等成衮扎布等奏擒獲叛賊尼  
瑪並扎那噶爾布被擒之信副都統職銜由屯貝勒旺布多爾濟  
效力可嘉由屯著授爲副都統旺布多爾濟給與郡王品級其首  
次得功及被傷官兵俱著查明議敘朕昨命兆惠回至濟爾哈朗  
軍營特爲擒拏扎那噶爾布尼瑪等賊今成衮扎布等業經擒賊  
已諭令停止前來見在惟擒拏巴圖爾烏巴什搜剿阿巴噶斯哈  
丹昂吉岱等遊牧地方始可甯謐又如色布騰巴勒珠爾疏脫之  
吞圖布中秋疏脫之諾諾什王俊臣疏脫之美諾和什亦必查拏  
擒獲方無後患成衮扎布等其益加奮勉以奏膚功○癸丑 上

奉 皇太后駐蹕避暑山莊○甲寅 皇十三子永璽薨○乙卯  
諭軍機大臣等成衮扎布等奏稱台吉琿齊達瓦等殺扎那噶爾  
布獻馘來降又招降額琳沁達瓦等語琿齊等殺賊自贖尚可受  
降若額琳沁達瓦始猶抗拒繼迫兵威何得信爲降服著傳諭雅  
爾哈善永貴等俟端濟布將降人送到時曉示琿齊達瓦有擒殺  
逆賊之勞大皇帝恩旨許爾自贖賞還原職卽來京朝覲爾等遊  
牧亦當內移又向琿齊等面示額琳沁達瓦爾係被迫投降非伊  
等之比今解送京師候旨看伊等情形稍有猜懼卽於軍營正法  
亦可若俱行解送卽宜嚴加防範勿致脫逃至伊等遊牧人眾有  
強悍可疑者卽當剿絕所餘戶口或歸併烏魯特鄂拓克內居住  
酌量辦理○丙辰兆惠等奏臣等因察訪逆賊阿睦爾撒納蹤迹  
遣順德訥帶兵往古爾班察爾直至俄羅斯之境據順德訥報稱

六月十三日至鄂遜綽確特山遇哈薩克阿布賚之弟阿布勒比斯稱係奉富參贊之令擒拏阿睦爾撒納隨據哈薩克遣人告知阿布賚亦在此閒因酌帶十數人前往相見阿布賚云我已投順中國 大皇帝今欲擒獻阿賊黨羽以贖前罪等語因告阿布賚云 大皇帝三路發兵務擒逆賊因爾哈薩克投順暫將額爾齊斯一路停止進兵若阿逆不在俄羅斯烏梁海卽入爾境昨又據拏獲之厄魯特等供逆黨額布濟及達什車凌烏勒木濟齊巴罕等於我副都統鄂博什兵到前一日俱各分散我等旣屬一家當同往擒拏阿布賚云伊等若入我界卽當擒獻再我等哈薩克有三部落我係鄂爾圖玉斯頭目奇齊玉斯烏拉玉斯皆我族兄爲長已遣人至塔什干令其一體投順亦必遣人入貢等語隨以馬二百餘匹易換官兵衣物銀兩於十六日辭歸是日過鄂遜綽確

特山至塔爾淩河見有賊蹤次日尋至俄羅斯境之鏗格爾圖喇  
遭人告知十八日俄羅斯喀丕坦等前來相見免冠叩請 大皇  
帝安因告以我將軍大臣爲逆賊阿睦爾撒納逃竄派兵分拏看  
賊眾大槩竄入爾境應遵彼此不納逃人之議擒送喀丕坦等云  
阿睦爾撒納前遣使來已拏送我察罕汗其本身及屬人若果來  
投豈敢背約藏匿等語詰問再三喀丕坦等因給與並無阿逆印  
文並行文邊界查拏遂於二十日帶兵回程路經烏梁海舊地亦  
俱捉生詢問等因臣等又於二十七日據哈薩克阿布賚遣使解  
送達什車淩齊巴罕至軍營告稱阿布賚等於十九日至阿爾察  
圖適阿睦爾撒納率二十人來投告以明早相見因先散其馬匹  
牲隻阿賊驚覺同數人逃去僅將達什車淩齊巴罕拏獲送來又  
遣人到霍集伯爾根處令將烏勒木濟拏獲如阿賊亦在彼自必

一併擒送等語臣等復訊問達什車凌齊巴罕僉供阿逆於本年三月帶鄂畢特等人眾搶掠扎那噶爾布遊牧聞大兵來遂四散奔逃後大兵追急阿逆即將糾合之巴爾達穆特等遊牧移至喀拉瑪而自率兵三百駐守額布克特山後爲大兵擊敗止帶二十餘人逃入喀薩克雖阿布賚好言安慰仍生疑懼及眾哈薩克前來搶奪已不知去向又供稱阿逆曾於途次告眾云我等若投俄羅斯則此生爲人奴僕儻哈薩克再不相容則無路可去等語臣等看來使所告情形達什車凌等所供阿逆窮蹙已極必不能倖逃法網見於哈薩克俄羅斯相通各路分哨搜拏以期必獲其達什車凌齊巴罕先行押解送京諭軍機大臣等兆惠富德奏稱哈薩克擒獻達什車凌齊巴罕據來使所言知阿睦爾撒納勢甚窮蹙見在分路堵截等語所辦尙合機宜順德訥此次甚屬奮勇出

力著加恩賞給副都統職銜仍交部議敘鄂博什雖追賊稍遲尙能竭力進剿從寬免其議處其餘效力官兵著兆惠等查明報部議敘○戊午諭軍機大臣等雅爾哈善等奏稱端濟布送到扎那噶爾布首級及歸降之琿齊達瓦等請旨辦理等語扎那噶爾布首級卽於肅州通衢梟示其妻女及噶勒藏多爾濟之妻俱著解京至琿齊達瓦已諭成衮扎布許其贖罪如情願來京可派員押送儻稍有猜懼卽行正法其拏解額琳沁達瓦辦理伊等遊牧之處俱遵照前旨行又扎那噶爾布之宰桑庫圖古爾等遊牧已照例辦理其端濟布等隨帶博卓爾克等六人旣供明巴哈曼集去向又爲官兵嚮導著從寬免其正法○己未諭軍機大臣等朕思成衮扎布舒赫德等此次進兵辦事茫無頭緒卽如辦理喇嘛一事因伊倡言煽惑玷黃教而害生靈必須大示懲創何以總未奏

及豈盡隨巴圖爾烏巴什前往土爾扈特耶卽巴圖爾烏巴什亦未必往土爾扈特不過隱藏山僻邊界處所今巴圖爾烏巴什終在何處明瑞色布騰巴勒珠爾所辦綽和爾烏拉特昂吉岱等遊牧見在如何俱應查奏正欲降旨傳諭適成衮扎布奏報克喀特之得木齊畢魯特等潛逃見在派兵追勦又沙喇斯之三都克等遊牧內移欲帶兵尾隨防範等語夫軍營所恃惟在將軍大臣成衮扎布雖爲將軍尙未面受訓旨其一切機宜俱諭知舒赫德令與將軍同心辦理伊起程時卽有畏難之意看其節次奏摺不過招撫數鄂拓克至伊犁行走一次便調了局卽如尾隨沙喇斯遊牧內移直欲藉作歸計耳將軍大臣欲歸官兵孰不欲歸者舒赫德係獲罪至重之人朕加恩予以自新之路早知伊仍畏怯如此不當遣往軍前如奉到朕旨能恐懼改悔尙屬可追若因循如故

將並治其前後之罪不知伊如何承受再鄂實爲參贊大臣宜知自效乃此次進兵以來隨行逐隊毫無奮勉亦著嚴加申飭可惜朕之巴圖魯侍衛官兵爲此輩無用之人統轄實不勝憤懣著傳諭伊等加意振作將查拏喇嘛追勒巴圖爾烏巴什等事宜相機速辦至明歲辦理回部一事此時應加慎密見據拏獲奸細所供霍集占已聚兵防備雖究無能爲總以不使知覺爲善前令於吐魯番駐兵今恐聲息相聞仍令在巴里坤駐紮已傳諭貝子額敏和卓矣

八月庚申朔俄羅斯請由黑龍江挽運本國口糧 上以其違約不許○壬戌諭軍機大臣等據唐喀祿車木楚克扎布奏稱往兆惠咨文前赴科爾沁辦理阿逆所留種地之烏梁海等派兵先行令副都統職銜瑚爾起續進途次捉生詢問知杜爾伯特貝勒巴



圖博羅特台吉阿喇善公舍楞等與阿逆相通潛住額爾齊斯河未隨其汗車凌遷移游牧隨派瑚爾起於六月十五日帶兵前至輝巴朗山後擒獲巴圖博羅特等勦其屬人其阿逆所留種地之烏梁海五十餘戶全行勦殺見在領兵赴塔爾巴哈台按拏阿睦爾撒納哈薩克錫喇等語唐喀祿車木楚克扎布和衷商辦甚合機宜著交部議敘並將御用荷包鼻煙壺加恩賞賜其領兵擒拏巴圖博羅特等之瑚爾起亦著議敘首次得功之托郭齊等與勦殺烏梁海有功之侍衛穆倫保等俱分別獎賞陣亡官兵著交部議卹○命四川運米五萬石於湖廣備賑○升任山東巡撫鶴年奏臣蒙恩補授兩廣總督感激無地然臣有不可去者四一微湖積水漫溢見與藩司分晰籌辦將地勢稍高易涸與次窪可涸極窪難涸之處分爲三等除易涸可涸地畝仍種田禾外其餘難涸

者或栽蒲葦或種菱藕或施網罟或爲水櫃冀轉害爲利不使災民坐困水鄉皆須經理督辦遽易生手終多扞格一東省應賑者三十餘州縣衛所經災區已面約親爲查辦今賑尙未辦臣竟避勞就逸於心何安雖特簡撫臣自善區畫何如臣先查後辦之親切也一東省水患頻仍皆平日不能思患豫防所致臣於二月通飭所屬以一府有一府之水利一縣有一縣之水利應作何開濬修防見已確查詳議應辦者俟農隙興舉此緊要關鍵臣一去任恐致遷延當親爲妥辦以藏厥工一見與侍郎裘曰修定議開濬伊家河一切工料事宜亦須臣逐一經理且尙有與河臣會勘挑濬運河及築隄工程俱有頭緒自應原議之人會同商辦懇鑒愚忱另簡督臣准臣再留山東巡撫之任得旨覽奏具見良心然朕實因無人故不得不用汝可將此奏並朕諭旨告之蔣洲令其妥

辦蔣洲頗實心自能勝任也仍遵前旨行○癸亥諭軍機大臣等  
劉統勳等查審郭一裕一案訊明郭一裕詐僞貪鄙款蹟按律擬  
流並請查封家產此案情節郭一裕與恆文各自有應得之罪而  
輕重不同恆文贓私纍纍眾證確鑿家產自應查封以懲貪黷所  
查郭一裕各款不過交屬員代買物件短發不及百金更有將原  
物退還者卽其令屬員修造花廳一節亦止數百金較之恆文情  
罪亦應有差等若卽一例辦理殊不足以服其心已有旨傳諭定  
長將伊貲財照舊給還不必查封郭一裕見已在途劉統勳應飭  
令委員妥協伴送俟到京之日另降諭旨至恆文前已降旨拏解  
來京滇省距京甚遠宜加意防範嚴密關防毋令伊家人窺探消  
息致伊畏罪自戕劉統勳卽不得辭其咎矣著一併傳諭劉統勳  
知之○成衮扎布等奏臣鄂實等帶兵辦理克喀特遊牧追剿叛

逆之各得沁人眾於七月十三日追賊至哈什河悉行剿滅由烏納哈嶺回營又因接應明瑞等甚屬緊要臣鄂實派兵二百名令巴圖魯侍衛濟塞布等前往復派兵率副總管莽蘇爾等將叛賊藏匿遊牧者悉行剿殺查克喀特一鄂拓克共十九得沁除莽蘇爾根達什等八得沁移入內地外其叛逆之各得沁俱陸續剿滅收獲馬駝三百餘牛羊五千餘又有暫委總管之阿咱喇巴圖巴拉俱年未成丁被迫從亂隨即投順協同剿賊但伊等祖父世爲頭目未便仍居本地或於軍營正法或賞給官兵爲奴至莽蘇爾根達什等情願內移可否安插巴里坤附近俱請旨遵行諭軍機大臣等成衮扎布等奏辦理克喀特遊牧內移之八得沁俱送交巴里坤大臣辦理其阿咱喇巴圖巴拉著便中解送來京又奏稱鄂實派兵二百交待衛濟塞布等帶往等語所奏究屬含混明瑞

等辦理綽和爾等鄂拓克一月有餘何以並無信息且鄂實卽應帶兵前往而轉派侍衛著傳諭鄂實令其明白回奏○甲子兩江總督尹繼善奏籌辦疏洩湖水情形查南陽昭陽微山等湖眾流所歸宣洩之路有二一自江南小梁山茶山等處出口由荊山橋至王母山歸入運河一自山東湖口閘入運由得勝六里鉅梁萬年丁廟頓莊候遷台莊等八閘及江南之河清河定河成三閘經宿遷桃源過清河之雙閘以抵楊家莊一由草壩歸入黃河一由鹽河開壩下注入海此湖河之來源去路也臣因湖口閘應添滾壩已會奏酌辦又細加籌計自湖口閘以下各閘層層關鎖河身未免窄狹水大時賴以宣洩者全在各閘之越河今查自湖口閘至黃林莊山東運河長七十餘里得勝等八閘各有越河以閘門越河並計較正河尙不甚窄自黃林莊至貓兒窩江南運河長八

十里見在水面寬二十三、四、五丈不等。河清等三閘各有越河以閘門越河併計較正河窄至五六丈不等。今當急籌宣洩見會商河臣白鍾山將河清河定河成三閘越河委員估計再各挑寬五丈。則湖口閘並荆山橋下去之水更得暢流。再宿遷運河北岸有王家溝草壩一處見在駱馬湖水由壩口流入運河。雖係常年舊制。但此時以宣洩微山湖爲要有此王家溝之水入運橫截未免上源來水被阻。已商之白鍾山速將王家溝相機堵閉。又查清河縣之雙閘原係草壩亦有正河越河漕船過後拆去草壩已寬三十二丈。今又拆去四丈共寬三十六丈以達尾閘去路。目下楊家莊口門出水甚暢並有鹽河閘壩一股向東分流運河下游不至阻滯至荆山橋一帶奉旨令夢麟再加開濬臣當協同辦理得旨。此奏類屬盡心如所議速行仍恐疏洩不暢應再悉心講求。○丙

寅兆惠等奏七月初六日額布克特西卡報稱有兵二百餘從愛  
呼斯雅爾河前來臣等遣侍衛達禮善帶兵往探次日帶領哈薩  
克霍集伯爾根之子拜達里克喀喇巴喇特之弟瑪密等到營告  
稱聞阿布賚投順 大皇帝因徧行曉諭各游牧我父兄聞信卽  
帶兵接緝阿睦爾撒納先遣我等來見並擒巴雅爾屬人尼瑪爲  
贄以求賞賜臣等言尼瑪係我兵勦滅餘賊無關緊要非阿睦爾  
撒納可比若擒獻阿逆自有重賞因遣人往迎霍集伯爾根等卽  
率屬六十餘人至營告稱願爲臣僕並云阿睦爾撒納若在我等  
游牧必行擒獻辭歸時必加諄諭伊等懇給印文爲投誠之據復  
於兩營閒設卡令官兵將所餘什物及俘獲人口與哈薩克交易  
共得馬二百餘匹臣等伏覩霍集伯爾根喀喇巴喇特情詞恭順  
謹將給與印文緣由及伊等所屬頭目名單呈覽諭軍機大臣等

覽兆惠等先後奏摺看其情形逆賊阿睦爾撒納卽可就擒但不當因哈薩克投順遂爾倚恃顓頊阿逆奸狡性成或自哈薩克逃出遠離塔爾巴哈台潛伏僻地或料知入冬我必撤兵於察罕烏蘇等處藏匿此處宜分派兵丁輕騎來往嚴行搜緝其哈薩克頭目霍集伯爾根等著傳旨撫慰並各賞蟒段二端大段四端以示獎勵○辛未諭額敏和卓曰據爾奏稱請於明年四月進兵願從軍自效等語朕已鑒悉至進兵之期三四月俱可又所奏兵數雖亦計出萬全之意但以我兵精銳直抵回城尙不須多爲調集爾受恩深重奮勉可嘉卽授爲領隊大臣於爾所屬派兵一百名在前鋒行走俱照軍營兵丁一例賞給此際宜加慎密不可稍有漏洩○欽差侍郎裘曰修安徽巡撫高晉奏會勘宿靈虹積水情形籌辦疏濬事宜豫省虞夏商永四邑之水畢匯於宿恃以宣洩者



惟睢河查睢河因毛城鋪等處減洩之黃水累年浸灌積漸成淤  
上年毛城鋪開放至本年四月始閉黃水直流一載是以徐溪口  
一帶竟成平陸此睢河上段之在宿者全淤之故也睢河既淤則  
豫省諸水及宿境山水散流漫衍遂於徐溪口南北分爲兩股南  
一股自張家溝至猪羊山衝斷十五里堡驛路下至時村由唐溝  
歸睢河之下段入於五湖北一股自牛家樓至高黃壩於時村迤  
下由三村歸睢河之下段亦入五湖此兩股均有河形臣等擬就  
此因勢利導分一爲兩開至苻離集下仍入睢河正身視舊河之  
底岸淤平七十餘里挑濬較易其苻離下至靈壁之霸王城等處  
閒段淤淺應一律挑深以暢去路再霸王城下卽靈壁之五湖今  
則連而爲一田沈水底民多遷移細勘形勢其地最窪卽多開溝  
渠無益不若捐之於水以爲儲蓄之區水沈田畝查明請豁至虹

縣之板橋地方名小河口則睢河之入五湖者至此復露河形東南一路趨謝家溝經古汴河入洪澤湖東北一路由烏鴉嶺經宿遷之歸仁閘下安河入洪澤湖謝家溝今雖深通河頭河身尙覺淺狹應開寬烏鴉嶺下見有砂礪應挑挖其餘支河宿州則彭家溝澥河柏山河靈壁則斗溝拖尾河沱河虹縣則荀家溝岳家河等處均須一律挑濬以暢分流虹縣又有潼河一道受水極大向由林子河經歸仁閘以東之涵洞入安河今林子河淤塞已久亦宜舍舊圖新從潘家山南之徐家冲開通以達董家溝歸安河入洪澤較爲徑捷此三州縣積水情形臣等酌擬之辦法也至烏鴉嶺董家溝安河係虹縣泗州宿遷桃源四州縣壤地相錯之境皆須會同辦理董家溝在宿遷境見已全淤安河則界連宿遷桃泗三州縣亦閒段淤淺金鎖鎮劉李埂田家集陡門等處上下八十

里爲入洪澤之咽喉尤爲緊要皆須逐段開挖必此處較上游深  
通而後睢河一帶之水順流直達施功次第當由此起見行文下  
江督撫諸臣確勘詳估以便及時辦理若夫睢河雖治仍爲每歲  
減洩黃水之路必如何始免淤墊此又在督河諸臣通盤籌畫期  
於久而無弊者也諭褒曰修高晉等奏會勘宿靈虹積水情形籌  
辦疏濬事宜一摺於該處水勢之來源去路頗爲明晰所言歷年  
受病之由及目前利導之法已具得其要領前曾降旨令在事諸  
臣將勘明工程及時辦理見奏宿靈虹等處疏濬各工應興舉者  
卽時興舉不必會商往返致稽時日朕爲百姓生計並不惜費惟  
期用之於實永遠消患而已總之侍郎裘曰修夢麟河臣白鍾山  
嵇璜張師載並各該督撫受命同事止如一人原無分此疆彼界  
所見旣確卽應一力擔承務期歲前竣事始於河工有裨而不誤

明春耕種爲要至毛城鋪爲睢水上游欲睢河之無淤墊計惟有  
堅閉毛城鋪苟非盛漲不得開放萬不得已如今歲之自行漫溢  
卽當於斷流之後將黃水淤沙盡力挑濬若少因循則今年淤一  
尺明年卽淤二尺河身墊高節節阻礙年復一年其淤更甚故逐  
年挑濬深通是爲要務河臣當永久奉行其睢河下游皆達於洪  
澤湖而洪澤湖以清口爲出路前經指授河臣於汛前將草壩拆  
卸俾得暢流已有成效嗣後卽以此爲成法不待盛漲一遇水勢  
長發隨時酌量拆卸草壩豫爲洩水之地從前惟恐運河水少故  
須蓄以濟運今則惟患其多情形迥異此所當因時審度不可執  
一而論者也向來河員習氣欲保隄工則以開毛城鋪爲長策至  
於下游之清口則又墨守舊規憚於拆卸草壩以致出水不暢啓  
閉兩失河工日就敝壞而沿河州縣歲受其災河臣能於此等肯

緊處恪遵所示機宜以時蓄洩當無後艱所有見議應開支河趕辦竣工去累年淤阻泛濫之積患不特宿靈虹等州縣漸有起色上游豫東諸積水皆有所歸民生利賴所關甚鉅諸臣其共勉之○癸酉諭軍機大臣等見在兩路收服之厄魯特等甚多伊等外雖投順多係畏威乞降其心未可全信如姑息養奸將來必致滋事著傳諭將軍大臣等看其情形毫無可疑者卽移向額林哈畢爾噶等處指給遊牧以備來歲屯田之用如稍懷叵測卽移至巴里坤再令移入肅州卽行誅戮朕從前本無如此辦理之心實因伊等叛服無常不得不除惡務盡也將軍成衮扎布兆惠等將見在來降之厄魯特查明具奏分別辦理如應指給遊牧則不必送巴里坤其送至巴里坤者尤須愼密如稍有漏洩則聞風驚竄地方益難甯謐並傳諭阿里衮黃廷桂等知之○免兩淮鹽戶水災

積欠○截留湖南漕糧十萬石補還湖北倉儲運五萬石於河南  
備賑○兆惠等奏臣等派圖倫楚帶兵百名於和博克薩里等處  
進剿據報沿途剿殺賊眾收取馬駝探得哈薩克錫喇在哲克得  
里克等處種地於七月初十日至和博克捉生詢問知哈薩克錫  
喇統眾三百前來遂於阿爾噶凌圖相遇我兵奮力攻擊殺賊百  
餘哈薩克錫喇敗走以山險馬乏未能追及詢知哈薩克錫喇由  
戈壁逃往鄂什地方隨派索倫侍衛三達保帶兵前往策應又臣  
等前派愛隆阿帶兵五百名自巴爾楚克至濟爾哈朗接續臺站  
接剿賊眾有庫圖齊訥爾阿喇布占五十餘戶善披領集賽五十  
餘戶俱先自投降隨親身投見又於沙喇博和什嶺前遇杜爾伯  
特納木奇遊牧遣人乞降旋又逃去我兵追及始行投見俱解送  
軍營臣等行文收取伊等器械馬匹據報善披領屬人卽行交出

惟納木奇屬人口出怨言查納木奇受封貝勒職銜伊子車凌烏巴什爲扎薩克台吉從前搶掠臺站隨從阿睦爾撒納今雖勉強乞降實不可信除將納木奇父子解京其屬人六百餘盡行剿殺至庫圖齊訥爾善披領等俱懷叵測亦行文愛隆阿令其續行辦理報聞○甲戌諭軍機大臣等據成衮扎布等奏稱准雅爾哈善移文派三格帶兵由額貝諾勒進剿巴圖爾烏巴什等查軍營見兵一千有餘見在辦理沙喇斯瑪呼斯克喀特等遊牧令滿福照看內移並策應明瑞俱屬緊要今選兵四百名交由屯旺布多爾濟接剿額林哈畢爾噶逸賊其餘兵親自帶往策應明瑞會合一處於伊犁登努勒台等地方接剿賊眾等語巴圖爾烏巴什等賊業有蹤迹伊等自應疾速追擒乃遣由屯等帶兵辦理瑪哈沁竟將巴圖爾烏巴什諉之雅爾哈善意謂一經奏及卽責有所歸顯

係舒赫德驚怯取巧直欲脫身事外耳卽如兆惠等剿賊甚多而伊等止擒一尼瑪且係被北路驅迫有何奮勉效力之處又伊等於剿賊機宜往往含糊覆奏而遇撤兵運糧等事輒條分縷析此皆舒赫德一意欲歸草率從事今伊等旣由珠勒都斯追剿務將巴圖爾烏巴什擒獲朕看舒赫德此次效力與否若迄無成功惟伊等是問○乙亥 上奉 皇太后自避暑山莊巡幸木蘭行圍○諭軍機大臣等薩喇爾當厄魯特變亂時觀望畏縮不能奮勇復仇是以降旨拏問但伊曾奏及巴雅爾尼瑪等雖降必叛其言頗驗今巴雅爾等旣已生擒扎那噶爾布亦經獻誠哈薩克阿布賚率屬歸誠計阿睦爾撒納自可旦夕俘獲著將此等情節傳諭薩喇爾施恩免罪出獄將從前賞給瑪木特房屋令其居住○己卯成衮扎布等奏據明瑞咨報七月初二日擒獲厄魯特等令其



引路至布昆哈瑪爾問知綽和爾等渡庫克烏蘇糾合昂吉岱杜爾伯特烏喇特等盤踞阿圭雅斯山中伏密林以待因派兵截其去路賊見卽逃尾追至業克特里克嶺攻奪一寨至第二寨石峰林立冰雪堆積馬乏不能奪取臣等因賊踞險阻明瑞等暫駐以息馬力是以親往策應相機辦理諭軍機大臣等成衮扎布奏稱眾賊合兵走險明瑞等力不能取等語將軍等自應前往策應但賊眾烏合皆伊等玩忽所致若從前到伊犁時能候賊出入卽行勦殺亦不至會於一處矣况伊等前奏昂吉岱係微末台吉今綽和爾烏喇特人等皆相附和可謂無關緊要耶明瑞等領隊前行不能破賊已屬選懦若將軍參贊親往更難以力弱自解且有帶去礮位正可攻堅伊等務宜盡勦羣賊乘勝擒拏巴圖爾烏巴什及搜勦阿巴噶斯哈丹等遊牧勉之勿怠○庚辰諭據鶴年奏稱

疏防限滿留於地方協緝之革職知縣何志倬見在患病請如部  
議高晉摺令回籍等語閱之頗覺不當因令詳查原案乃知雍正  
六年定例重犯越獄州縣官限滿不獲者革職仍留地方協緝以  
懲疏玩此實整飭吏治之道法至善也乾隆二年嵇曾筠尹會一  
先後奏停協緝之例其時朕御極之初於庶務情弊實未周悉遂  
依部議停止今春高晉奏請仍復舊例所奏甚是朕令部議該部  
自應准行乃遽以乾隆二年業有成例議駁得旨允行此朕日理  
萬幾一時疏忽之誤此本既下不肖劣員益得恃爲護符以致鶴  
年亦復援例爲該革令奏請不知監獄係地方有司專責若重犯  
脫逃迄無弋獲一經離任輒得晏然以去其何以儆玩縱而重職  
守耶若謂留於地方恐致滋事則是以廢員而重干法紀益當重  
治其罪豈可轉以此爲開脫之路嗣後州縣官疏防限滿著仍照

雍正六年定例革職留於該地方協緝其朦朧議駁高晉摺之該部堂官著交部嚴加議處鶴年並不權事理之輕重遽爾奏請亦屬不合著一併交部議處○辛巳叛賊巴雅爾達什車凌俱於行在審明正法○癸未升任山東巡撫鶴年奏德州四屯漫口於十四日堵築完固地畝已漸涸出惟三屯決口水深溜急驟難合龍查德州之北哨馬營有滾水壩一計涵洞三十孔孔寬一丈原以洩運河異漲由鉤盤河入海見深通者僅五孔隨飭募夫挑挖自初十興工後運河水較前已落二尺餘卽三屯水亦漸落然口門極深處尙二丈餘今隄身已築三十餘丈未能下埽者三丈餘臣札商漕臣楊錫紱飛調德州衛回空糧船二十隻於河內一字排列以禦水勢視其波回溜轉擇稍淺處晝夜趕築攔水月隄一道長九十餘丈於十九日工竣既絕來源其下游被淹地畝漸將涸

出再查德州之南四女寺地方亦有滾水壩一金門寬八丈遇運河盛漲由減水河遞入老黃河歸海今淤久應逐段開濬估計興工諭軍機大臣等鶴年所奏堵築三屯決口及挑濬支河一摺內稱四女寺哨馬營二處皆運河歸海之路見已興工挑濬等語朕前以運河異漲非洩之入海不能稍減是以降旨方觀承鶴年等令於徒駭馬頰等處相度歸海之路設法疏濬原非欲復九河故道總期於洩南運河之水使之入海今鶴年所奏四女寺哨馬營等處既爲洩運尾閘此卽朕諭中所及該撫等自當及時開濬以收疏導之益至此此外或尙有可資宣洩者亦應留心查勘次第辦理總之多一入海之路卽多一洩運之路不必拘泥也尋鶴年方觀承會奏臣等兩接廷寄會勘運河宣洩事宜查山東境內自德州至南旺七百餘里內有德州哨馬營四女寺減水壩各一隄外

老黃河一道卽古鉤盤河也博平縣馬頰河設有減水壩一減水  
閘二涵洞一聊城縣徒駭河設有減水壩一減水閘二至東阿縣  
屬之張秋鎮舊有五孔三孔橋各一兩橋之間乾隆十九年復建  
減水閘三今年盛漲時俱過水自三四尺至一丈五尺不等見在  
尙一尺至六尺不等合計閘壩各口門共寬八十六丈三尺皆以  
宣洩運河入海其馬頰河河身寬自二十丈至一百餘丈容水爲  
多老黃河次之徒駭又次之此皆運河舊有途徑茲哨馬營壩口  
並壩下引河業奏明挑挖深通其四女寺壩外十二里有德州三  
十里鋪大橋橫亘高埂之上橋內深外淺而自嚴家莊至玉泉莊  
中閒四十里並無河身應一律挑濬吳橋以下老黃河及馬頰徒  
駭二河均於乾隆十四年挑濬今淤墊頗多均應徹底疏通又馬  
頰河於海豐境內將近入海處所有羊沽橋支河一道見爲居民

築堰斷流應拆毀又各河所經橋座兩頭土壩甚長束水不能暢  
流並須拆改展寬添設木橋臣等已派明白河員每處二人挨查  
直至海口逐段測量水勢分晰開報俟水消覆勘分別工程難易  
或勸用民力或動帑興修會同河臣次第酌辦得旨覽奏俱悉○  
乙酉雅爾哈善等奏端濟布奎瑪岱等招服台吉達瓦等戶口仍  
前追巴哈曼集等七月十四日至克伯訥克圖嶺捉生詢問知巴  
哈曼集等在瑪納斯河源之小衛和勒昂居住隨帶兵向追遇前  
掠臺站之賊扎木布游牧勦賊五十餘人生擒扎木布又遣招降  
巴哈曼集屬人有得木齊瑪勒占等率二百餘戶來降據稱巴哈  
曼集帶百餘戶越大衛和勒昂嶺而逃端濟布留管新降戶口派  
新降之瑪勒占等隨總管布喇勒圖往追查扎木布曾搶巴罕庫  
蘇臺站應卽正法其瑪勒占等十得木齊戶口俟內移時分別辦

理報聞○丁亥諭去歲擒勦叛賊阿睦爾撒納進兵至哈薩克西路以達爾黨阿爲將軍北路以哈達哈爲將軍伊等旣抵哈薩克未能擒獲阿睦爾撒納而哈薩克之阿布賚復致免脫理應從重治罪朕意伊等未必有心誤事不過爲賊所愚路遠遲誤之所致耳是以降旨將伊等微勞抵罪免其處分後經詢問自軍營回之侍衛官員則咸稱達爾黨阿領兵追趕阿睦爾撒納相距一二里逆賊不及馱載反遣人謂哈薩克卽欲擒獻阿睦爾撒納惟待其汗阿布賚至卽便送至乃達爾黨阿墮賊奸計俟其擒獻並未督兵遣捕且下令不許眾兵前進直至逆賊捆載脫逃後方遣兵追趕哈達哈則路遇哈薩克阿布賚旣經後隊官兵呈報並不勒兵追捕至阿布賚逃去始尾隨追趕一次以塞其責眾奏僉同達爾黨阿哈達哈俱係擢用爲將軍之人似此怠玩債事不可不治其

罪因將伊等公爵革去降秩示譴今訊問拏獲逆賊阿睦爾撒納之姪達什車凌及宰桑烏巴什供稱阿睦爾撒納於去歲九月盡閒自敗走地方潛回又據尼瑪供稱去歲大兵追及阿睦爾撒納我催促打仗將軍等未允等候阿布賚擒獻是以阿睦爾撒納得以脫逃彼時如儘力前進即可擒獲再阿布賚對而安營亦並不奮勇打仗一味遲延直至阿布賚逃去始行追趕旋即撤兵其急於撤兵一事亦係將軍等商酌辦理等語供詞與自軍營回之侍衛官員所奏俱屬脗合觀此則伊二人不惟不能用朕奮勇之官兵反爲逆賊等所輕視矣達爾黨阿哈達哈俱勦舊子孫爲朕股肱受恩承襲公爵且身爲將軍帶兵追剿逆賊旣遇賊首阿睦爾撒納哈薩克汗阿布賚反墮賊術中因循觀望失誤事機坐致逆賊免脫實出情理之外且去年由哈薩克撤兵時據達爾黨阿哈



達哈奏稱我兵所抵之伊什勒椿集距逆賊阿睦爾撒納逃竄所至之地速行亦需月餘賊去既遠時亦寒冷是以九月初間自伊什勒椿集撤兵行走五十餘日至巴顏鄂拉地南之哈薩拉克地方等語今據拏獲之達什車凌及宰桑烏巴什供稱阿睦爾撒納聞大兵撤回由伊逃竄所至之地於九月盡閒起身前來經過伊什勒椿集行走二十餘日至巴顏鄂拉又行走十五日抵哈薩拉克地東之額布根塔爾琿地方共計行走五十日等語使逆賊逃竄所至之地距我兵所到伊什勒椿集地方果如達爾黨阿哈達哈所奏有月餘程途則阿睦爾撒納由伊敗竄所至之地過哈薩拉克返至額布根塔爾琿地方卽盡力速行亦必須兩三月餘方可能到且逆賊性極詭詐亦斷不肯貿然而行必已實知我兵撤回之信方行起身我軍由伊什勒椿集撤後與阿睦爾撒納相距

月餘程途迨伊差人探聽得實再由哈薩拉克至額布根塔爾琿  
地方又必須三四月之期矣乃我兵則於九月初間由伊什勒椿  
集撤回行走五十餘日始抵哈薩拉克而逆賊阿睦爾撒納即自  
伊所逃竄相隔月餘之地九月盡間起身而來既經哈薩拉克復  
至額布根塔爾琿亦止行走五十餘日何以如此之速豈能飛來  
耶以此推之伊等所奏逆賊阿睦爾撒納逃竄所至之地與我兵  
所至之伊什勒椿集謂有一月程途者其被賊所欺愈覺顯然今  
觀此事前後情節去歲逆賊阿睦爾撒納逃竄所至之地初不甚  
遠當時伊等如果奮力前進必可就擒何至疏脫費如許力乎觀  
阿睦爾撒納今歲春閒即到額林哈畢爾噶地方此即達爾黨阿  
哈達哈每事因循惟圖速回之明證也况今歲哈薩克阿布賚遇  
我兵三十餘名一戰即降則去歲伊等稍肯奮勉直前逼之想阿

布賚亦必投誠早將逆賊擒獻矣觀哈薩克阿布賚今歲之投誠又去歲達爾黨阿哈達哈不會用力之明證也再伊等兩路兵丁會合後理宜聯爲一體諸事商辦而伊等竟於初見之次日卽分營行走至第三日卽議及撤兵有是理乎且伊等卽能和衷盡力擒拏尙未卜能將逆賊擒獲與否而乃各分彼此豈能獲賊耶且如逆賊阿睦爾撒納免脫後我兵追逐達爾黨阿哈達哈俱係將軍若肯親行豈不勝於諸參贊大臣乃伊二人並不前往止遣阿里袞一人領兵追逐不知用伊等爲將軍所司何事達爾黨阿哈達哈如此種種貽誤軍情若不將伊等治罪則國家之賞罰何在而後此誰復出力報效耶此於用人之道所關甚大法難寬宥本當以軍法從事但達爾黨阿本一糊塗無能之人爲賊所愚而哈達哈每圖安逸遇事因循不肯奮勉俱尙非出於有心若果有心

致賊逃竄朕必將伊等從重治罪立正典刑然旣誤用於前復姑容於後此卽朕之咎也伊等身爲將軍且係勳舊子孫似此坐失機宜玷辱滿洲更何顏面覲列班聯達爾黨阿哈達哈俱著革職發往熱河披甲效力行走

九月壬辰諭軍機大臣等昨詢問尼瑪見在藏匿之綽羅斯台吉等據供尙有昂吉岱薩木丕勒諾爾布特古斯孟克尼瑪諾顏哈什哈納喀達等五人著傳諭成衮扎布等進剿哈薩克錫喇等賊眾時將尼瑪所供五人留心查拏解京此外如有綽羅斯之人亦照此辦理○癸巳成衮扎布等奏臣等帶兵接應明瑞派副都統由屯侍衛老格等分路剿殺瑪哈沁據由屯等報稱克喀特種地賊人聞我兵過巴罕納喇特嶺卽逃向哈什八月初八日追至圖爾根河遇賊力戰勦殺收楞額博索庫勒等百餘人收其妻子器

械營長伊靈阿索音達爾勒殺塔里雅圖口賊百餘人察克瑪河口賊四十餘人侍衛老格報稱於濟爾哈朗河勒殺烏魯特七戶四十餘人於博多美和囉勒殺克噶特百五十餘人收其馬駝牛隻又遣取明瑞信息之侍衛海林泰於庫哲圖地方遇賊二十人殺賊三人奪馬四十匹臣等仍令海林泰帶兵一百名巡查烏納哈特嶺各臺站又明瑞等咨報行至特克斯因馬匹疲乏暫駐口糧已罄撥取綽和爾所種地畝勒殺瑪哈沁三百餘人侍衛濟塞布追獲綽和爾五十餘人收其牛羊詢問賊人所守阿圭雅斯營壘俱已棄去或往察罕烏蘇或往沙喇伯勒等語臣等卽尋蹤前往堵截又准兆惠咨稱巴圖爾烏巴什已往沙喇伯勒等語沙喇伯勒距特克斯程期半月或阿巴噶斯哈丹賊人及綽和爾烏喇特昂吉岱等賊俱與巴圖爾烏巴什會合臣等竭力前往辦理諭

軍機大臣等據成衮扎布等所奏綽和爾等賊人與巴圖爾烏巴什等在沙喇伯勒會合必至滋生事端自當奮勉勦殺何得以官兵馬力爲詞伊等從前於克特烏魯特等鄂拓克人眾若早爲殄滅收其牲畜因進勦巴圖爾烏巴什計已奏功乃惟務姑息安撫以致賊眾會合始覺辦理之難其何所歸咎且明瑞等雖經進勦總未追及賊人成衮扎布等何以並無一語參奏賞罰不明誰肯用命著伊等同奏○甲午 上駐蹕布呼圖大營 御行殿哈薩克阿布賚及弟阿布勒比斯使臣齎表入覲賜宴○命江南被災地方例賑折價外每石加給銀二錢○乙未諭軍機大臣等據唐喀祿等奏稱准兆惠調兵接應圖倫楚已派喇爾起帶兵三百名前往惟是兵丁口糧不敷馬力疲乏路遠難於接濟不能忍饑步行今準噶爾全部已定阿睦爾撒納又溺水身死哈薩克錫喇

必被西路大兵擒獲請遵前旨撤兵再臣等從前卽應撤兵乃專意擒取阿睦爾撒納遠至塔爾巴哈台以致兵馬疲乏請交部治罪等語昨兆惠奏唐喀祿有一面具奏一面撤兵之報朕已將唐喀祿交部議處今覽伊奏以勉強前行請罪朕屢諭伊等追擒哈薩克錫喇何嘗令其撤兵卽有豫籌撤兵之語亦謂交辦事竣之後耳豈見諭擒賊而卽令撤兵耶唐喀祿若但歸咎於口糧馬力將兵撤回不過交部議處乃竟以遵旨撤兵飾詞取巧視朕爲何如主僅予議處不足示懲著革去侍郎副都統職銜降爲藍翎侍衛交納穆扎爾差遣效力車木楚克扎布仍著從寬免其交部○戊戌諭秋審官犯冊內擬斬之原任湖南布政使楊灝一案定擬緩決甚屬紕繆閱之不勝駭然楊灝身爲藩司乃侵肥剋扣至三千餘兩此其貪黷敗檢本應立行正法以彰國憲監候已係朕格

外之恩朕以爲該撫審擬招冊及三法司九卿科道等廷獻時自當入於情實乃冊內妄以該犯限內完贓歸入緩決試思藩司大員狼藉至此猶得以限內完贓槩從末減則凡督撫大吏皆可視婪贓虧帑爲尋常事侵漁剋扣肆無忌憚幸而不經發覺竟可安然無恙卽或一旦敗露亦不過於限內完贓仍得保其首領其何以飭官方而肅法紀耶廷臣等於此等案件並不權事理之輕重竟爾恣意欺罔蒙混照覆將視朕爲何如主朕臨御二十二年所辦案件內外臣工所共見共聞尙敢如此竊弄威柄施黨庇伎倆朝臣亦可謂有權今日檢閱之下不勝手戰憤慄原擬之蔣炳著交部嚴加治罪三法司著交部從重嚴加議處其與審之九卿科道等俱著交部議處嗣後凡有新案官犯無論情實緩決槩行黏籤聲明毋得遺漏蒙混在京票擬之大學士等依據葫蘆並不夾



籤聲明是何意見著明白回奏諭軍機大臣等秋審官犯冊內參革藩司楊灝原以侵扣穀價問擬斬候今該撫以限內完贓擬入緩決甚屬悖謬已將該撫交部嚴加議處九卿科道並未較正亦已交部議處矣楊灝受朕特恩簡用藩司乃敢侵扣銀至三千餘兩之多負恩枉法罪無可貸監候已屬恩典豈得藉口完贓更從緩決蔣炳奉到此旨卽率同藩臬二司將楊灝親押卽行正法儻洩漏風聲俾先知覺或至自戕殞命不及明正典刑卽令蔣炳抵償著卽行傳諭蔣炳知之仍令具摺由驛速奏又諭蔣炳將官犯楊灝一案恣意欺罔混入緩決甚屬乖謬著卽革職富勒渾補授湖南巡撫馳驛赴任到省之日再將此旨當蔣炳面傳卽行擊解來京任所字蹟貲財嚴行查封具奏毋得稍有洩漏○諭據雅爾哈善等奏稱琿齊額琳沁達瓦復叛已行文將軍辦理等語厄魯

特奸狡性成反覆無定初降之時辦理必須妥協卽如三格等進  
勦額琳沁達瓦因端濟布告知業經招降卽行撤兵原屬率易著  
傳諭雅爾哈善將端濟布等從前如何招服琿齊額琳沁達瓦之  
處查明具奏仍速催三格等將巴圖爾烏巴什阿巴噶斯哈丹遊  
牧賊眾奮力擒勦毋得玩忽從事○諭阿里衮等奏稱沙喇斯瑪  
呼斯遊牧叛逃已傳諭滿福令其作速帶兵擒勦並諭將軍成衮  
扎布兆惠等軍行所至嚴行勦殺勿以姑息養奸著傳諭阿里衮  
如有移至巴里坤賊眾卽遵前旨速往肅州辦理再雅爾哈善奏  
稱達瓦之弟鄂爾奇達遜已送往巴里坤等語俟其到日卽著解  
送來京○庚子以雅爾哈善爲兵部尙書

由戶部侍郎遷

○辛丑

上奉

皇太后駐蹕避暑山莊○諭郭一裕參奏恆文一案已據劉統  
勳定長審擬奏到恆文令屬員買金短發金價及巡查營伍縱容

家人勒索門禮等款俱屬確實而郭一裕始則亦令屬員買金製鑑迨見恆文短價闔屬喧傳恐事由伊始因而先發制人以自爲掩覆之計皆其實情恆文身爲大臣不能正己率屬乃以進獻爲名短價勒索私飽已稟見據所查任所貲財至數萬餘兩恆文非素封之家其歷任封疆不過二三年養廉所入除足敷一歲公用及往來盤費外卽極爲節嗇亦何能若是之多是其平日居官之簞簋不飭不待言矣昨劉統勳面奏乃尙謂恆文之敗檢皆由於家人恣橫所致其意似爲恆文卸罪者此則所見非是恆文果以潔清律己奴僕下人其孰敢肆行無忌至是恆文亦非昏憤無能之流又何至爲所蒙蔽全無覺察况勒索門禮卽係家人所爲而購金短價受屬員餽送豈亦家人教之耶恆文深負朕恩情罪重大雖不至如楊瀝剋扣穀價朘削脂膏必當肆市者可比而鄂善

伏法之成例具在此而曲爲寬宥其何以飭官方而肅吏治著派侍衛三泰扎拉豐阿馳驛前往於解送所至之處卽將此旨宣諭賜令自盡伊雖有老母而孽由自作國法所在朕亦不能爲之曲宥也至郭一裕爲人本屬庸鄙前歲曾面奏願捐養廉羨餘銀一萬朕彼時欲嚴加懲治姑面加訓責令其悛改詎意其到滇後復有購金製鑪之舉試問各省督撫誰有以金器充方貢者此仍其捐銀故習至其到任以後一惟以聲色貨利殖產營運爲事深忝封疆之任但其在官尙不至如恆文之狼藉同一購金而發價並未短扣郭一裕著革職從寬發往軍臺效力以爲大吏鄙瑣者戒外閒無知之徒於兩人情罪未及深悉或不免妄生議論謂郭一裕以漢人參劾滿洲終致兩敗俱傷此則無識之甚朕前旨舉

皇祖辦理張伯行噶禮之案 家法昭然且郭一裕之爲人亦得

與張伯行相提並論乎朕於此案亦惟協乎大公至正情罪輕重  
一歸允當而已將此宣諭中外知之○諭軍機大臣等蔣炳審擬  
楊灝緩決一案背公黨私已降旨富勒渾將蔣炳鞫解來京治罪  
矣朕向聞人言有謂陳宏謀素與楊灝不睦是以劾參治罪果爾  
則蔣炳何以不明白代爲申理昭雪顧欲藉限內完贓朦朧出脫  
耶是則人言卽實蔣炳亦無所辭咎但外閒既有此議論必當體  
訪確實著傳諭富勒渾問之蔣炳據實奏聞再秋審定案乃臬司  
衙門辦理之事然此等大案無不出督撫之意者楊灝緩決一案  
或係蔣炳先行授意抑或夔舒自行定擬蔣炳依據葫蘆然在尋  
常案犯尙不可不行詳檢楊灝爲藩司大員出入生死所關豈有  
漫無斟酌之理亦著詢問蔣炳夔舒據實覆奏著一併傳諭富勒  
渾知之○壬寅調夢麟爲戶部侍郎以阿桂爲工部侍郎

由內閣學士遷

○調董邦達爲吏部侍郎以陳惠華爲工部侍郎孫灝爲左副都

御史

由通政使遷

○以叛賊尼瑪及其子袞楚克車凌於故將軍和起

墓前凌遲正法○乙巳

上奉

皇太后自避暑山莊回鑾○己

酉諭據兆惠富德奏稱詢問自森博羅特遇見之人據伊供稱逆賊阿睦爾撒納帶領八人前赴俄羅斯被俄羅斯人拏獲送往察罕汗又有由哈薩克投來之厄魯特供亦相同看來逆賊阿睦爾撒納往投俄羅斯屬實請遣使索取等語前因伊等奏阿睦爾撒納落水淹死彼時朕卽降旨以爲阿睦爾撒納斷未淹斃必係俄羅斯之人將伊收留否則逃回仍往哈薩克決不出此兩途今看兆惠等所奏俄羅斯果將逆賊收留則又何必猶在彼處尋覓蹤迹朕已另降諭旨令行文薩納特衙門索取矣兆惠等接到此旨可卽令順德訥前赴俄羅斯之森圖拉地方向彼告稱哈薩克人

報稱阿睦爾撒納帶領八人逃往俄羅斯等語可見爾等將阿睦爾撒納私匿屬實想爾等亦不敢專主必送往爾察罕汗處矣惟是從前爾等謂阿睦爾撒納落水身死之處我等已奏聞大皇帝大皇帝當卽洞鑒已降旨索取阿睦爾撒納向薩納特衙門行文想爾察罕汗必念兩國素相和好遵照原定不匿逃犯之條將阿睦爾撒納送來我等從前謂爾俄羅斯亦係一大部落斷不相欺不意爾等乃如此行事若非大皇帝明鑒幾爲爾等所欺矣我等今亦不在此守候欽遵大皇帝諭旨回兵順德訥將此曉諭後卽將兵丁及卡座撤回至大營兆惠富德亦不必在見今駐兵處久留想此際額爾克沙喇努三等亦漸次到來卽不然陸續差往之人亦多不必在彼等候目今應拏者惟巴圖爾烏巴什哈薩克錫喇琿齊等數賊況巴圖爾烏巴什既有投往哈薩克之信兆惠等

帶兵迎其來路成衮扎布等隨後尾追兩路夾攻則巴圖爾烏巴什必就擒獲計擒獲巴圖爾烏巴什之時亦已屆冬令可卽由彼撤兵卽或賊眾不能盡獲閒有一二脫逃者亦俟來年再行辦理其撤兵或在濟爾哈朗或在額林哈畢爾噶過冬著將軍成衮扎布兆惠及富德卽遵照朕從前所降諭旨來京商議明年辦理回子及伊犁等處餘剩賊眾等事方爲妥便若此際俄羅斯已將阿睦爾撒納送來自無庸議否則明歲亦不必擒拏但將應辦之葉爾羌喀什噶爾回子之事盡皆妥協料理後再作商議目今斷不必計及阿睦爾撒納將此一併寄知兆惠富德並令曉諭哈薩克阿布賚謂大皇帝旨諭看來逆賊阿睦爾撒納入俄羅斯屬實阿睦爾撒納斷不安然靜處必懷爾等哈薩克將伊擒拏之恨欲行搶擾爾等亦未可定如爾等不及覺察忽來搶取必受其害是皆



因爾等投誠爲我臣僕故爲爾等計慮周到曉諭爾等爾等須留心防備可將此諭旨乘伊來人之便令其轉諭阿布賚如無使人卽繕寫一信寄往可也○命江蘇截留明歲漕糧二十萬石備賑

○以常亮爲湖北布政使由熱河道遷○庚戌諭軍機大臣等從前將

軍兆惠等駐紮伊犁遣副都統阿敏道領索倫厄魯特兵收服布拉呢敦霍集占等伊等詐稱畏厄魯特擾害若肯撤回卽行投順阿敏道遂撤回厄魯特兵帶索倫兵一百前往今據總管五十六等報稱到沙喇斯遊牧聞布拉呢敦等謀叛阿敏道及兵丁百人俱爲所害等語阿敏道雖爲叛賊等所愚究屬捐軀殉難深可憫惻著同隨行官兵俱照陣亡之例交部議卹○辛亥 上奉 皇太后還京師○壬子諭軍機大臣等夢麟等所奏豫省東南面入淮幹河請暫緩興挑俟一二年後酌看清口之宣洩若何五壩過

水之多少再行估辦等因一摺此所見朕殊不以爲然在諸臣之意恐淮水之來源過大洪湖一時不能容納未經暢出清口必先徑趨五壩而爲淮揚下河之病諸臣止知在江言江自朕視之則江南河南均屬一體固不得各分畛域且河南一省積年多被水災而該撫並未奏聞今始查出賑恤江南之下河一帶本係連歲被災每年食賑之處且近年又幸豐收以兩省目今情形而論其先後緩急之閒固當卽以宣洩河南之積水爲事况治水之道必籌下游之去路以達來水之奔流若恐貽患下游而先事壅遏上流必致騰注潰決更爲下游之患否則散漫旁溢而以鄰爲壑矣見在五壩洩出清水所謂歸江歸海之道逐一疏通卽使過水稍多亦當另爲設法以達其去路豈可遽欲壅遏上流坐視河南全省之積困試問誰非朕之赤子乎卽云東面已開幹河可洩歸德

等屬之水而東南面之幹河不開中州仍不免受害而七道之水仍必分注入淮河如豫爲下游籌宣導之路使節節深通盈科後進且相時蓄洩操縱得宜自不至一時全集洪湖不能容納何至爲以待來年之說乎可傳諭夢麟尹繼善白鍾山嵇璜等令其速爲妥協會辦務期豫省明年不致復罹水患以副朕念切災黎之意亦不可因有此旨遂置洪湖之漲溢於不顧而不爲通盤籌畫置身事外另摺批諭聯爲一體四字所當善爲體會並諭裘曰修胡寶琮知之○甲寅諭軍機大臣等端濟布奏稱在羅克倫孟克圖嶺收獲噶勒藏多爾濟宰桑羅布扎尼瑪得木齊敦多克等將造言惑眾之古隆格瑪木特正法其戶口什物牲畜交送巴里坤羅布扎等送出噶勒藏多爾濟之幼女派伊屬人照管送京等語端濟布此次所辦尙合機宜從前端濟布招降琿齊達瓦惟事姑

息以致復叛朕已命兆惠等查明治罪今功過相抵著加恩寬免  
並傳諭兆惠等知之○免山東臨清衛水災屯戶上年逋賦及濟  
甯等五州縣耗羨○丙辰撥湖南漕米十萬石於河南備賑○丁  
巳諭牧令於民最親其賢否所繫最重前恐外省督撫各存意見  
登之薦剡者未必盡出於至公而實在循良之吏或致淹滯有十  
年不調之歎是以降旨令將歷俸十年以上者送部引見蓋恐實  
有才具可觀久屈下僚者冀得簡拔數人以供驅策且示鼓勵乃  
數年陸續引見各員多屬尋常供職之人求其才猷出色者甚少  
類皆庸庸者流適膺簡僻小邑得以藏拙故可姑容其至十年之  
久者幸耳卽如今日之廣東揚江縣知縣李青廣西武緣縣知縣  
嵇坊其人殊無足觀較之督撫題升薦舉之員相去甚遠可見數  
年來各督撫於保題升調尙不敢逞其私意屈抑人材嗣後此等

俸深人員如本人情願引見仍照例送部其有不願者聽不必僕  
僕道路徒費往返然人材具雖限之於天而志由自立果能實心  
任事必有實惠及民所當奮勉向上爲國家有用之員上司自有  
聞見若該督撫等因有此旨遂不秉公詳慎徇情濫舉或於闕茸  
衰庸之輩曲爲隱庇以博寬大之名則大非朕委任封疆之意矣  
將此通行傳諭知之○諭鎮江距江甯不過百餘里較之乍浦之  
與杭州其路更近乍浦旣屬杭州將軍統轄京口應照此例亦不  
必另設將軍歸於江甯將軍統轄爲是其副都統二員專駐鎮江  
辦理旗務江甯將軍閒月一次至京口查閱營伍考驗官兵所有  
照常辦理諸事副都統就近管理其應行會同將軍者仍會同查  
辦○己未撥甘肅米麥五萬石於陝西備賑

冬十月壬戌 上幸南苑行圍○淮河東買運蒙古鹽斤○癸亥

上行圍殪虎○命尙書劉統勳往山東督修運河○欽差侍郎  
裘曰修等奏臣與張師載由南旺至張秋鎮及運河南下逐段相  
度水勢稍退然南陽至韓莊閘東西三百餘里尙一望無涯南北  
隄岸斷續仍有數十里全無緯道轉瞬重運北上誠慮趕辦不及  
臣夢麟臣蔣洲先後俱到悉心籌畫西岸隄工緯道經由之處見  
已微露隄形三十餘丈應請先行趕辦期於河水未凍之先竣事  
其有隄根坍入水中工人無從立腳者必俟伊河開放水勢大消  
始可估辦然數百里水面猶恐宣洩不能立待伏查南旺舊制三  
分南行七分北行今大溜南趨倍於往昔臣張師載見於分口兩  
岸接長南壩收短北壩切去灘觔俾順勢北行臣等更擬於糧艘  
回空後嚴閉南閘盡啓北閘暫使汶水全往北流俟伊河放水運  
河下段隄岸盡出不能施工之處可以次第興舉至明春正月中

旬以後接續動工併日趨力一切緯路三月中旬竣事重運濫行不致遲誤至南陽以上水勢已落惟查隄岸殘缺閘座坍塌涵洞淤塞者分別增修及時辦理得旨恐汝等分身不及今又遣劉統勳前往專司運河一切工程此摺可與之同酌妥爲之○甲子賜哈薩克阿布賚等敕諭曰哈薩克汗阿布賚阿布勒比斯爾等遣使亨集噶爾塔納錫阿塔海烏穆爾泰都楞阿蘭扎拜克奈等於熱河朝覲朕加恩筵宴擬從行在遣回而亨集噶爾等懇請來京是以令其隨駕入都重申宴賚念阿布賚等遠在外藩若照內地扎薩克授以爵秩恐爾等有拘職守仍依爾舊俗各安游牧庶無擾累若爾等遣使入覲朕不靳恩賞至爾來使奏稱塔爾巴哈台原係爾等舊遊牧懇恩賞給等語此地新經平定尙屬荒閒朕本無所惜但爾等甫效歸誠未有功績若卽行賜給於國家體制未

合爾心亦必不安爾等果將逆賊阿睦爾撒納擒送前來自當加恩賞給爾使臣來時正值大兵絡繹前進是以由兩路行走今當冬季撤兵之期恐長途防護稍疏賞賜爾等物件致有遺失茲特派散秩大臣和碩齊巴圖魯侍衛富錫勒穆倫保帶領索倫蒙古兵丁護送爾使由額爾齊斯塔爾巴哈台至古爾班察爾其賜爾阿布賚阿布勒比斯衣物若干使臣到日爾等祇受又賞來使七人衣物若干及使臣隨僕等市買物件共賞銀千兩俱諭爾等知之嗣後勉抒誠悃自必優加恩澤永享無窮之福特諭○諭軍機大臣等據塔永甯奏蔣洲於山西布政使任內虧帑至二萬餘金升任時勒派通省屬員彌補尙有不敷又於壽陽縣方山木植賣銀補項等語此事實出情理之外爲之駭然塔永甯既有此奏不得不徹底清查審明虛實著劉統勳卽傳旨將蔣洲革職鞫問帶



往山西並摺內有名之楊文龍等一併嚴審定擬具奏任所字蹟  
貲財一併查明奏聞已有旨令鶴年仍回山東辦理巡撫事務此  
時印務交阿爾泰暫行署理鶴年行程想尙不遠計日即可抵東  
運河一應工程已傳諭鶴年接辦劉統勳於審明完結之後再赴  
工次可也又諭據塔永甯奏蔣洲於布政使任內侵用帑金升任  
時勒派屬員彌補並賣穆納山木植補項等語殊駭聽聞已將蔣  
洲革職拏赴山西質審但查審此案非劉統勳不可其所辦東省  
運河各工惟鶴年尙能熟悉初升任時有四不可去之奏廣東總  
督印務見有李侍堯署理鶴年仍回山東以總督辦理巡撫事務  
專理一應工程運河卽在境內原可往來督理不必專駐濟南省  
會俟劉統勳審案完結赴工後鶴年再赴廣東可也○調劉槩爲  
山西布政使蘇崇阿爲河南布政使○乙丑調舒明爲理藩院左

侍郎

由吏部調

以果勒敏爲內閣學士

由給事中遷

○丙寅命烏魯木齊分

兵屯田○以雅爾哈善署定邊右副將軍○加賞達什達瓦及扎

哈沁噶勒丹達爾扎等籽種○丁卯命哈甯阿會勦沙喇斯瑪呼

斯賊眾○庚午命巴里坤開渠屯田○辛未諭軍機大臣等昨諭

兩路將軍大臣等於十二月初十日以內來京請訓俟來春進兵

今思將軍成袞扎布宣力軍營將及一載自應稍爲休息來年令

伊在烏里雅蘇台辦理副將軍事務車布登扎布辦理諸事皆合

機宜較從前大有進益來年進兵以兆惠爲定邊將軍以車布登

扎布爲右副將軍著車布登扎布卽馳驛來京請訓喀爾喀王公

內有能協同辦事之人伊卽指定一二人具奏無庸派出兵丁但

將親隨人役酌量足用仍加恩賞銀二千兩爲整理行裝之用其

行裝就近自烏里雅蘇台由阿濟必濟先行發往巴里坤伊與納

穆扎爾交代後作速來京○壬申諭內外問刑衙門辦理刑名案件往往惟事姑息一切情罪之應正法者苟可巧爲開脫輒文飾獄詞擬入監候緩決一入緩決則每年秋審例得屢邀寬宥該犯徒負一斬絞之名轉得偷生視息以囹圄爲送老地幸遇寬典或且安然事外坐使冤死者無償命之期而刁惡莠民益無所敬畏近來刑名案牘日多一日未必不由於此卽如一毆殺也獄成定讞必以爲曲在死者其有事關服制以卑幼而傷及尊長不曰救親情急卽曰尊長起釁凡若此類招冊中不可枚舉總以展轉迴護曲爲之貸殊不思人命關天必期生死兩無所憾若徒爲生者力爲保全則死者不且重被冤抑乎將謂生者之命可惜則死者獨非命乎在督撫州縣等以爲如此辦理可使該犯留一綫之生路部臣定擬亦以已成之案樂於從寬完結不知事關刑獄務期

情罪允當有意從寬與有意從嚴其爲刑罰不中一也如今日山東省秋審情實冊內丁士賢丁士麟二犯不能查察伊弟丁文彬造作逆書及劉海劉馬二犯不能查察伊叔劉德照造作逆詞該部均照大逆緣坐律擬以斬決朕改爲監候此等關係國家體制非殺人抵命可比轉可爲之原情至人命所繫朕倍加留心獄詞稍涉蒙混必推究實情不稍寬貸是諸臣雖欲曲爲開釋亦終不能也且並有明知不能開釋而故爲一可上可下之語以爲吾救命之心盡矣此何爲耶不可笑乎昔皋陶曰殺之三堯曰宥之三朕亦何樂而不以宥賁爲恩但諸臣舉無一執法之人則朕轉不得不存廢法之懼若果但爲積陰德之舉則每年不句到卽句到而於情實者皆不句斯朕所存之陰德必較諸臣爲大而天下政理其尚可問乎夫馭民之道不貴刑治而貴以德化吾君臣不能

以德化民是可愧也然德所不能化非刑其何以治之若徒博寬厚之美名因循姑息致奸匪毫無懲儆獄日益繁多豈所論於刑期無刑之道哉將此通行傳諭內外問刑衙門知之○夔舒以辦理楊灝一案蒙混審轉革職以沈作朋爲湖南按察使由廣東南韶道遷○甲戌賜李國梁等六十人武進士及第出身有差○乙亥諭吏部侍郎舒明員缺著三泰補授范時綬身尙抱病不能勝戶部繁劇之任其戶部侍郎員缺著裘曰修調補所遺吏部侍郎員缺著五福調補仍暫兼戶部侍郎事務不必兼管正黃旗漢軍副都統其員缺卽著范時綬補授○丙子諭軍機大臣等據劉統勳奏面訊蔣洲據供因修理衙門多用銀兩以致虧空等語外閒亦有爲此說者此言究未可信修理藩署需費卽多何至二萬餘兩其爲藉端捏飾不問可知但明德與蔣洲共事經年兩署僅一牆之

隔蔣洲如此侵虧狼藉明德豈毫無所知何以並未奏及正恐不  
無別故卽或竟諉爲不知而藩司侵帑至此猶一無聞見巡撫所  
司何事耶著傳諭劉統勳塔永甯一併詳細查察明德何以爲之  
庇護抑或實係失於覺察之處務得確情據實陳奏蔣洲供內又  
有挖穆齊圖欠三千兩之語看來挖穆齊圖爲人亦甚不妥其在  
山西養廉頗優何以去任起程時又須蔣洲爲之擔承至三千金  
種種情節俱當悉心研究使水落石出毋得草率完結再劉統勳  
見帶蔣洲前往山西途次亦宜速行不可久稽時日更宜留心防  
範勿令畏罪自戕可一併傳諭知之○命阿里衮由珠勒都斯接  
應將軍成衮扎布臺站○己卯撥江蘇漕米五萬石於安徽平糶  
○賜吐魯番貝子額敏和卓敕書並參贊回部軍務○壬午上  
幸靜安莊臨送 淑嘉皇貴妃金棺○丙戌諭據塔永甯所奏山

西各屬虧空摺內稱知州朱廷揚新舊兩任侵虧帑項至二萬有奇又稱武職中之守備武璉亦侵虧營項一千餘兩由此類推其恣意侵蝕而未經查出者更不知凡幾該省吏治尚可問耶乃塔永甯奏稱若遽行盤查恐通屬驚惶必致貽誤地方政務一面剴切曉諭速行完補等語殊不免有畏首畏尾之意且據劉統勳塔永甯另摺所奏蔣洲案內道府勒派情節於楊龍文署內查出派單一紙而太原府知府七賚復連名作札向各屬催取明目張膽竟如公檄視恆文之授意派買更有甚焉以致各屬中之素有侵虧者皆無所顧忌如朱廷揚周世紫皆盈千累萬此又與蔣洲之勒派無涉吏治至此尙不爲之徹底清釐大加整飭何以肅官方而清帑項此等劣員被勒者情在可原不過如滇省被勒諸屬處分而止至如楊龍文七賚朱廷揚等則罪無可逭一經審究盤查

百可立見底裏塔永甯何所瞻顧而爲此調停之奏耶七資並著革職拏問交與劉統勳一併嚴審究擬看來清查一事非塔永甯所能獨任卽著劉統勳會同該撫嚴行查辦不得稍存姑息又諭前任山西巡撫明德與蔣洲共事經年蔣洲侵虧狼藉明德豈毫無所知今復據劉統勳等奏到晉省州縣中侵虧庫項竟有至盈千累萬者是該省風氣視庫帑爲可任意侵用已非一日明德身爲巡撫察吏是其專責乃一任屬員侵帑營私至於此極實爲深負委任明德卽著都察院傳旨革職拏問遴委妥員解赴山西交劉統勳等一併審擬具奏任所贓財並卽查封永貴在軍營效力年久著回至西安署理巡撫印務永貴未到之前著吳士功護理永貴所辦軍營糧務著定長服滿後前往接辦○吏戶等部議覆河南布政使劉慥奏各省守巡各道及同知通判等官原有兼司水



利之責卽或向無兼銜者亦請槩兼水利凡有幹支河渠於冬令水落時責令地方官逐一查勘河身有無淤淺阻塞隄埵有無汕刷殘缺報明該管廳道親往勘實督率州縣於春融撥夫修濬河渠一律寬深隄埵補築堅固或工段縣長民力不繼酌定請旨動項辦理儻不實力查辦一經水發淹及田廬先將地方官及廳道查參分別議處再或因循玩忽積久不辦致河身阻塞隄埵殘廢除參處外並令分認出貲修濬應如所請行令各省督撫查明守巡各道及同知通判等官原兼水利者毋庸再行兼銜外如該地方有水利而尚未兼銜者分別具題到日再行辦理但各省事件責成全在大吏凡一切勘修工程該督撫應揆度地方情形隨宜辦理不得徒委廳道等官仍至有名無實將該督撫一併交部議處從之○丁亥諭彭家屏之子彭傳笏刑部擬入情實請旨旬到

此案彭家屏孽由自作罪所應得彭傳笏焚毀所藏野史實因倉皇畏懼迫於一時而子爲父隱情理尚有可原彭傳笏著從寬免句決囚重典凡有一綫可生者朕無不準情酌理曲加寬宥總之刑名所繫務期情罪允協殺之宥之一歸於至當而已

十一月辛卯命各部院甄別司員○賜吐魯番貝子額敏和卓貝勒品級○癸巳諭據劉統勳塔永甯審擬蔣洲虧空勒派一案白認不諱蔣洲乃原任大學士蔣廷錫之子由部屬擢用任至撫藩不思潔己奉公乃恣意侵虧數盈鉅萬又復勒派通省屬員以爲彌補之計其貪黷狼藉玷辱家門實出情理之外楊龍文身爲監司曲意逢迎侵帑勒派不法已極其情罪實無可寬宥蔣洲楊龍文俱依擬卽行正法以昭炯戒七賚作札催取但以知府而迎合司道較之楊龍文罪尙稍輕著依擬應絞監候秋後處決其餘應

行擬罪議處各官著劉統勳塔永甯等逐一查明分別定擬具奏  
另摺所奏明德收受蔣洲及各屬古玩金銀等物見已有旨革職  
拏問解赴山西著劉統勳等一併審明定擬至挖穆齊圖與蔣洲  
結納關通攜取蔣洲古玩收受銀物甚屬貪污無恥著革職拏解  
來京治罪山西一省巡撫藩臬朋比作奸毫無顧忌吏治之壞至  
於此極朕將何以信人何以用人外吏營私貪黷自皇考整飭  
以來久已肅清乃不意年來如楊灝恆文等案屢經發覺而莫甚  
於蔣洲此案若不大加懲創國法安在朕實爲愧憤蔣洲之罪重  
於恆文楊灝則郭一裕之派屬買金雖亦不能無罪而恆文之事  
實由郭一裕舉發尙屬彼勝於此郭一裕前在部呈請贖罪未准  
然恐將來各省督撫或有簞簋不飭而同官中以事相干涉懼於  
己有礙轉不據實入告將無由發覺其何以明國憲而儆官邪耶

郭一裕著加恩准其納贖劉統勳等摺並發○諭蔣炳審擬楊瀨  
侵扣婪贓一案擬入緩決希圖蒙混今刑部審訊蔣炳擬以斬監  
候實屬罪所應得但蔣炳辦理此案雖營私沽譽尙無受賄情弊  
著從寬免其斬候發往軍臺效力贖罪○軍機大臣議奏前因兆  
惠等奏阿布賚請將馬赴烏嚕木齊交易臣等議以途遠商販難  
集請官爲經理選熟諳交易之人照商人例不必顯露官辦形迹  
今據該督黃廷桂奏稱烏嚕木齊交易運費浩繁似吐魯番爲便  
其明歲交易止換馬若哈薩克帶有駝牛羊亦係軍營需用請一  
體收買其應需段匹由內府辦解絲色精良而官辦後仍必招商  
將來恐成色略減致煩言論見在陝省採買各色段及巴里坤見  
存雜色梭布京莊布均可敷用哈密見存茶頗多運用軍營餘駝  
酌量雇覓商駝添備車輛遴委道員同知副將酌派備弁兵丁押

送等語查臣等原議哈薩克交易在烏魯木齊因前與阿布賚定約奉旨允准似不便更易致失信遠人雖費繁原可增價至吐魯番近接邊陲建有城堡較烏魯木齊地方空闊可以隨處開市者不同恐哈薩克人等與回民熟習轉致滋擾應仍照臣等原議至收換馬匹馴馬外有隨帶騾馬亦可量收其他牲畜亦應一體收買疲瘦牲畜一切雜貨雖不應交易但念攜帶遠來或減價收留示以節制其段匹一項陝省既可採買應如所奏辦理至布茶尤哈薩克所必需今哈密既有茶巴里坤亦有購備布應雇商駝或添車運送不必挑用軍營餘駝其遴委道員同知副將等員並酌帶將弁挑派兵丁應需鹽菜口糧及商民人等願隨前往購買零星等件各聽其便俱應如所奏再該督奏派兵一百名係因吐魯番見有屯兵足資彈壓今既仍在烏魯木齊交易應否添派兵

丁亦聽該督酌量辦理明歲係初次貿易自當立定章程不可遷就而交易之際又必示以公平俾遐荒咸知天朝柔遠之經方爲妥協應交該督轉飭道協各員善爲經理諭軍機大臣等黃廷桂所奏籌辦來年哈薩克貿易事宜一摺已據軍機大臣議奏但貿易之事不過因其輸誠內嚮俾得貿遷有無稍資生計而彼處爲產馬之區亦可以補內地調撥缺額並非藉此以示羈縻亦非利其所有而欲賤值以取之也將來交易之際不可過於繁苛更不必過於遷就但以兩得其平爲是可傳諭黃廷桂令其善爲經理至奏內所稱委派道廳等員看來貿易之事終不可全以官法行之能辦政務者未必熟諳商賈朕思道員中如范清洪同知中如范清曠等伊家原曾承辦軍需及一切貿易應尙有舊時商夥習練其事或可於此二人中酌調一人赴甘承辦是否有益並著妥

議奏聞

○以宋邦綏爲廣東布政使起嚴有禧爲河南按察使

任原

貴州按察使

○甲午諭嵇璜奏高郵運河東隄添建石壩已經完竣並

請酌定水則如上游五壩過水漸多車邏南關二壩過水至三尺五寸開放五里中壩若車邏南關二壩過水至五尺再開放新建石壩視水勢之大小以爲啓閉自無壅潰之患等語此所見深得蓄洩機宜蓋湖河水勢以五壩爲來源以江海爲去路而歸江之路近於歸海况下河一帶地本卑窪必視歸江諸閘壩實有宣洩不及之勢始可以次啓放今春南巡時親臨指示令將車邏南關二壩常行開放俾河水得以隨時減洩而又早闢歸江之路以達其流下河田畝遂獲豐收此已試之明效自當酌定水則以時啓閉著照嵇璜所奏過水尺寸立誌壩旁以垂久遠然此特專就下河言之耳若論湖河全局則五壩之水洩自洪湖使洪湖之水從

清口暢流會黃入海則黃水不致有倒灌之虞而五壩之過水自可稍減向以河臣惟事護隄轉致湖漲遂有一潰難收之勢而清口則收束迫隘託言濟運不知近日運河之水患其多不虞其少前曾降旨白鍾山等以清口之東西二壩古人具有深意淮水力弱則資其堵束併力刷黃淮水盛漲之時則早爲宣洩以減其勢至於五壩則不得已而設此尾閘也因令於五壩過水一寸則東壩開寬二丈過水二寸則開寬四丈以期疏洩通暢不致奔溢五壩以爲下河之患昨據裘曰修夢麟白鍾山高晉奏稱今值冬令應照例束壩蓄水向來口門僅留十八丈至二十丈今據酌留三十丈湖水可以暢出等語是清口之水已不患其不暢流而會黃入海矣至春夏盛漲之期則仍遵前旨立爲水則視五壩過水之分寸以加展拓如此通盤籌辦操縱得宜則湖河全局自可永奏



安瀾之績矣但河官積習惟以因循守前規爲事可將此勦石於清口及運河東壩俾治河諸臣永遠遵行焉○乙未諭軍機大臣等見在逆賊阿睦爾撒納已逃入俄羅斯俄羅斯與喀爾喀毗連一應偵探防範事宜甚關緊要成衮扎布素得喀爾喀之心爲眾所推服且伊久在行閒亦宜稍爲休息著仍爲北路將軍辦理喀爾喀事務車布登扎布年富力强辦事雖不及伊兄而攻戰較爲差勝又經休息年餘明歲辦理回部以兆惠爲將軍車布登扎布副之已傳諭車布登扎布來京請訓再赴軍營雅爾哈善候伊到日卽將副將軍印務交代一同領兵前赴沙喇伯勒勒滅巴圖爾烏巴什等賊眾成衮扎布兆惠等亦卽來京商辦一切事務其沙喇斯瑪呼斯等賊已專交阿里衮滿福辦理成衮扎布等至巴里坤須作速趨行方不誤兆惠回抵軍營之期也○丙申以納穆扎

爾署定邊左副將軍親王德沁扎布爲參贊大臣○丁酉諭都察院甄別科道○戊戌諭軍機大臣等楊應琚所奏勘定浙海關徵收洋船貨物酌補贖關船稅及樑頭等款並請用內府司員督理關稅一摺已批該部議奏及觀另摺所奏所見甚是前摺竟不必交議從前令浙省加定稅則原非爲增添稅額起見不過以洋船意在圖利使其無利可圖則自歸粵省收泊乃不禁之禁耳今浙省出洋之貨價值既賤於廣東而廣東收口之路稽查又加嚴密即使補徵關稅樑頭而官辦止能得其大槩商人利析秋毫但予以可乘終不能強其舍浙而就廣也粵省地窄人稠沿海居民大半藉洋船謀生不獨洋行之二十六家而已且虎門黃埔在在設有官兵較之甯波之可以揚帆直至者形勢亦異自以仍令赴粵貿易爲正本年來船雖已照上年則例辦理而明歲赴浙之船必

當嚴行禁絕但此等貿易細故無煩重以綸音可傳諭楊應琚令以己意曉諭番商以該督前任廣東總督時兼管關務深悉爾等情形凡番船至廣卽嚴飭行戶善爲料理並無於爾等不便之處此該商等所素知今經調任閩浙在粵在浙均所管轄原無分彼此但此地向非洋船聚集之所將來止許在廣東收泊交易不得再赴甯波如或再來必令原船返棹至廣不准入浙江海口豫令粵關傳諭該商等知悉若可如此辦理該督卽以此意爲咨文並將此旨加封寄示李侍堯令行文該國商總徧諭番商嗣後口岸定於廣東不得再赴浙省此於粵民生計並贛韶等關均有裨益而浙省海防亦得肅清看來番船連年至浙不但番商洪任等利於避重就輕甯波地方必有奸牙串誘並當留心查察如市僧設有洋行及圖謀設立天主堂等事皆當嚴行禁逐則番商無所依

託爲可斷其來路耳如或有難行之處該督亦卽據實具奏再將前摺隨奏交部議覆可一併傳諭知之尋覆奏臣已遵旨曉諭番商洪任等同帆並移咨李侍堯及札行甯波定海各官一體遵照見在尙無設立洋行等情弊報聞○以石柱爲內閣學士由廣東布政使遷○己亥調馮鈐爲安徽按察使九成爲貴州按察使○辛丑諭軍機大臣等成衮扎布等奏據遣往堵截巴哈曼集之侍衛海林報稱在博囉托羅海地方捉生詢問知巴哈曼集爲得木齊哈勒拜所殺賊眾欲在崆吉斯恐有兵堵截卽由克喀特前去已過八站適與滿福相遇將情節告知而滿福以見在追剿沙喇斯等叛賊自巴顏阿滿一路安設臺站不可擅動兵丁因無兵追賊遂同滿福前進等語滿福帶兵追賊自應隨遇隨剿乃舍見在相近之扎哈沁而追遠竄之沙喇斯等殊屬懦弱滿福果能追剿沙喇斯

等尙可功罪相抵若藉口窮追不及馬力疲乏竟行撤回則其罪不可追著傳諭成衮扎布等看滿福呈報若何據實速奏若已起程前來卽交雅爾哈善查奏○甲辰命各省提鎮三年陛見○辛亥諭據德爾敏等奏報徐城增築石工於十一月十九日如式完竣一律整齊堅固等語披覽深爲欣慰徐城瀕臨黃河而舊有石隄間段斷續一遇盛漲時罹水患今春南巡親臨閱視指授增築石隄茲開工以來會未兩月遂克告成城郭民居永資保障諸臣能仰體朕念切民瘼之意奮勉集事迅速奏績甚屬可嘉德爾敏夢麟尹繼善白鍾山嵇璜陳宏謀並著交部議敘其在工文武員弁並著查明一體交部議敘以示獎勵○禁各省上司勒薦幕友○王子木和林以年老休致以吳拜爲左都御史石柱爲盛京刑部侍郎

由內閣學士遷

○甲寅以伊祿順爲內閣學士

由給事中遷

○乙卯命

刑部吉林遣犯改發雲南等省拉林阿勒楚喀遣犯改發黑龍江三姓等處○丙辰調吳士功爲直隸布政使清馥爲陝西布政使○丁巳命定長以副都統銜赴西路軍營辦理糧餉在領隊大臣上行走

十二月壬戌諭軍機大臣等據審訊賊黨烏勒木濟供稱去冬阿睦爾撒納在烏梁海時杜爾伯特之孟克博羅特曾相隨同去後又往納木奇遊牧等語從前愛隆阿勒殺納木奇賊眾之時未有孟克博羅特名目或竄入額爾齊斯等處藏匿亦未可定著和碩齊等留心查拏解送來京○富德奏臣牲兆惠咨文奉到諭旨以阿睦爾撒納逃入俄羅斯順德訥等不必在彼守候卽應遵旨撤回因前往哈薩克之額爾克沙喇努三等尙未回營暫令留駐臣於十月二十五日令鄂博什帶兵二百名前往額林哈畢爾噶沿

途接勦瑪哈沁與將軍會合昨據往哈薩克貿易人等帶來額爾克沙喇等書札聞阿布賚遊牧移向巴顏鄂拉又聞巴圖爾烏巴什出痘身死屬實再臣等聞烏梁海安濟格斯奎與俄羅斯素有讐隙派出署防禦達色等於本月二十四日至布克圖爾瑪安濟等十餘戶迎戰達色追射安濟遇石傷足前鋒卓丹卽奮力前進將安濟生擒其格斯奎亦被擒獲計勦殺烏梁海三百餘戶獎賞藍翎烏勒德克陣亡三等侍衛喀勒扎布等帶傷又於庫克鄂勒地方遇果勒卓輝之烏梁海等二十餘人放槍迎敵我兵墜馬者數人有甯古塔披甲人英德訥黑龍江打牲達呼爾達三保奮勇救出盡勦賊眾又在前隊行走奮勉之三等侍衛畢拉爾海吉林署協領扎庫齊索倫署協領金濟噶爾阿第木保察哈爾署協領喇嘛扎布藍翎侍衛達桑阿等俱出眾效力得旨富德所奏前隊

效力之畢拉爾海授爲二等待衛扎庫齊金濟噶爾阿第木保俱授爲協領喇嘛扎布授爲頭等待衛達桑阿授爲三等待衛擒獲烏梁海安濟格斯奎之達色卓丹俱授爲藍翎侍衛勦殺烏梁海之英德訥達三保俱授爲三等待衛其餘奮勉效力及陣亡得傷官兵俟造冊到日該部照例議敘議卹○諭滿福追勦沙喇斯瑪呼斯被叛賊敦多克哈什哈敦多克車凌等誘害伊等效力軍營爲成衮扎布信用遣往招降乃與賊眾相通情尤可惡來年將軍大臣等進兵務將二賊嚴行查拏送京看來厄魯特等真不可信卽三都克亦當留心察看儻有可疑或卽於軍營正法或派員解送來京不可致令脫逃○癸亥諭據阿爾泰奏稱鶴年於十二月初三日工竣回署痰喘不止卽於是夜身故等語披覽實深惋惜鶴年歷任巡撫頗能黽勉今春南巡時見其辦事妥協深堪委任



是以擢用兩廣總督仍命在東省辦理河務近據奏報挑濬伊河  
悉心籌畫俱能深愜朕懷開壩放水後積水漸消涸地甚廣雖履  
任未久而勞績懋著遽聞溘逝朕心深爲軫惻著加恩賞給太子  
太保兵部尚書銜並入賢良祠仍賞銀三千兩料理喪事所有應  
得卹典該部察例具奏尋賜祭葬諡文勤○諭兩廣總督員缺著  
陳宏謀補授陳宏謀籍隸廣西但久任封疆朕所深信且總督節  
制兩省又係專駐粵東自可不必迴避所遺江蘇巡撫員缺著託  
恩多補授江西布政使員缺著吳嗣爵補授山東巡撫員缺著阿  
爾泰補授所遺山東布政使員缺著馮鈐補授安徽按察使員缺  
著納世通補授江蘇按察使員缺著崔應階補授所遺常鎮道員  
缺著沈嘉徵補授○諭軍機大臣等鶴年見在病故已有旨令阿  
爾泰爲山東巡撫矣昨鶴年摺內曾奏伊熟諳工程實心任事能

勝此任一切河工要務阿爾泰當感動天良守其成規悉心妥辦方爲不負任使鶴年喪事並著阿爾泰留心經理善爲護送進京再鶴年偶爾痰喘何致猝然身故或係誤投醫藥亦未可定著阿爾泰查問伊家人如果用藥不慎卽應將醫生治罪是否如此情節並著具摺奏聞尋奏鶴年因辦事勤勞心力俱瘁途中未嘗調治回署之日病起倉卒醫治不及實未服藥得旨可惜之至○戶部議奏旗人存退餘絕地畝酌留千頃撥補官用餘照例安放莊頭辦理其入官地畝應交與該旗查明原業原收租數行令地方官照數徵解得旨依議其入官地畝交該旗查明原業原收租數行令地方照數徵收之處此等地畝以加惠小民而論卽租額再爲輕減亦無不可但向來官地租額雖輕而民佃多不沾實惠蓋地畝一項旣不在官又不在民則不肖官吏轉視爲利藪該部請

照原納租數徵收自爲杜絕弊端所奏是但旗人原收租數或係市平市斛而官爲收納勢必用庫平官斛則租數雖屬相符而貧民所加已屬不少嗣後入官地畝地方官照原數徵收著卽照原收平斛令其輸納庶俾承佃各戶交租不致畸重而官吏亦不致中飽矣○己巳諭大學士陳世倌雖年近八旬而精力未甚衰邁簡任綸扉歷有年所今以老病奏請解任回籍情辭懇切大臣中齒宿望高宣勞久任皤皤黃髮爲班聯表率誠熙朝盛事然老倦而思故鄉亦常情所有果其以衰老陳情者朕自曲加體恤俾得歸榮鄉里以資頤養初未嘗強爲羈留如張廷玉之年力旣衰朕卽允其歸田後之展轉獲咎乃其自取實非朕初意所及料也且陳世倌奏內旣稱爲其生母修改墳塋此亦人子未竟之責自宜及身而爲之著照所請准其回籍見任漢大學士原有二人不必

開缺另補聽其自爲酌量如一二年後精神尚健仍可來京辦事以昭優老念舊之意○諭軍機大臣等據阿里衮額敏和卓奏稱領兵至哈喇和羅知沙喇斯瑪呼斯遊牧已逃往庫車等處見在這熟識路徑之人取近堵截頗合機宜伊等遇賊遊牧收其馬駝固可以增兵力但與賊眾相持則帶兵尙覺其少朕心頗爲慮念阿里衮等惟相機行止如勢難猝辦即可撤兵儻額敏和卓確見庫車可取亦不必遽回遊牧○辛未諭翰林院所進撰擬閩浙總督喀爾吉善碑文殊屬草率喀爾吉善歷任中外宣力有年在大臣中實屬老成練達勤勞素著而爲人亦內外如一言行克顧勒碑紀績爲國家優卹茂典撰擬自當慎重乃旣譌弗勝之弗字爲勿而由閒散超登西掖之句尤爲舛謬夫起用於罷職之後究係曾任大僚豈得竟謂之閒散其意或以爲滿洲大臣碑文不必檢

點使漢大臣中有如此令名完節始終匪懈者當不致輕忽若此矣朕於滿漢臣工從無歧視考行飾終務期徵實唐宋以來制誥視草者往往於告身內以私意隱寓抑揚本朝百官封典皆定有成式詞臣文墨標榜惡習已無所施其隨時撰擬者惟碑文祭文若復於此而稍存軒輊此風斷不可長從前 皇祖時曾以楊瑄

撰文悖謬加之重譴所以防微杜漸具有深意謝墉前此撰文敷衍潦草已經察議今又措詞失當雖屬文學膚淺未必出於有心而率爾操觚何其誤之屢耶則不得謂之無意矣謝墉著交部嚴加議處該掌院等另行改擬碑文進呈○癸酉封成衮扎布之子瞻楚布多爾濟爲世子○甲戌命各省總督保薦堪膺專閫人員○准直隸收麴稅○乙亥准呂宋番船於廈門貿易○丁丑以徐鐸爲山東按察使

山東兗沂  
曹道遷

○庚辰諭舒赫德前在軍營屢干重譴

朕皆曲爲寬宥今春西師兩路進剿一時不得其人將伊加恩起用凡一切機宜俱詳悉面諭令其到軍營時傳諭將軍成衮扎布並戒以不可如前恇怯誓爲協辦軍務詎意舒赫德自進兵以來所辦諸事全不奮勉成衮扎布係蒙古人雖經戰陣然未面領訓諭舒赫德自應盡心襄助乃此次所辦諸事動失機宜卽如招服克喀特烏魯特等遊牧後卽當收其馬匹以益兵力使賊伎倆難施方得駕馭之道乃伊等任其屯駐山中致使賊有餘力大兵旣過隨卽叛逃舉此一端可見諸事全無成算及朕降旨詰責始東遮西露往來道途疲馬力於無用之地此皆舒赫德並不將朕諭旨詳悉傳示成衮扎布之所致也蓋兵法忌怯弱而舒赫德選懦性成兵法忌諱飾而舒赫德最工文過合計伊前後罪譴卽正法亦不爲過但西路進兵以來雖未能就緒尙不至大挫軍威若卽

真重辟伊反得諉過於成衮扎布矣朕念成衮扎布去年擒青滾  
雜卜之功看伊顏面貸舒赫德以不死然其不足復用所謂下愚  
不移亦屢試而知之者舒赫德著從寬免死革職令爲兵丁自備  
資斧在軍營效力贖罪伊子舒常亦因加恩舒赫德復授爲侍衛  
遣往軍營今舒赫德既經革職舒常仍革退侍衛發往黑龍江至  
鄂實以參贊大臣前往軍營不過隨同將軍行走並未奮勉效力  
亦當治罪但較之舒赫德尙屬稍輕鄂實著革職降爲藍翎侍衛  
自備資斧在軍營效力行走○癸未諭軍機大臣等今命兆惠爲  
定邊將軍車布登扎布副之來年辦理進兵惟兆惠等是賴可傳  
諭兆惠當與車布登扎布富德同心協力不可自分畛域至額敏  
和卓因其熟悉回部情形人亦果毅已命爲參贊大臣在前隊行  
走兆惠等務宜優待以收其益一切軍前事務相機辦理善爲策

勵以奏膚功又諭來年進勦回部宜先傳旨曉諭以布拉呢敦霍集占兄弟在噶爾丹策零時獲罪拘禁大兵平定準噶爾始行釋放因係回部頭目令其仍歸故土安集所屬以承恩澤伊等自應感激圖報永矢恭順之忱乃敢戕害使臣稱兵抗拒情罪難追但聞諸事皆霍集占陰謀不軌至布拉呢敦頗圖安靜其屬下人等亦係一時被脅非其本心今大兵進勦惟正霍集占之罪若布拉呢敦能將霍集占縛獻亦必宥罪加恩如此一面曉諭卽一面進勦不可按兵俟釁若伊等果相猜忌自於軍事有益可傳諭兆惠及雅爾哈善等知之○以如松爲兵部右侍郎輔國公○甲申諭大學士史貽直參贊綸扉陳世倌引年予告並熙朝黃髮老成端重宜晉崇階以示褒寵史貽直陳世倌俱著加太子太傅協辦大學士尙書鄂彌達敷歷中外宣力有年刑部尙書劉統勳復職以後



勤勞懋著俱著加太子太保○諭富勒渾奏生員陳安兆妄著書籍語多悖謬一摺據稱將伊所著書二種及詩藁一部送學臣毛輝祖閱看以詞句狂放容覆應請嚴加懲究並將該教官等查參等語所奏殊爲過當此事在富勒渾於文義本不甚深更未免因新進有意從嚴一聞事關悖逆輒欲從重懲治而毛輝祖又因所屬生員經巡撫舉發恐稍涉徇庇形迹遂亦從而附和是以該撫還有此奏但朕閱該生所著大學疑思辨斷中庸理事斷二書雖不無違背朱註支離荒謬要不過村學究識見膚淺妄矜著作卽詩藁中閒有牢騷詞語亦淺學人掉弄筆墨陋習其實非謗訕國家肆詆朝政如胡中藻之比封疆大吏遇此等事當識大體如果逞臆謗誹肆無忌憚自不得不懲一儆百若不過此等筆墨之過則前人亦往往有之况陳安兆所作並不足稱爲著述於此而加

以吹求轉無以服其心且恐開告訐之漸無知者遂謂無所措手足朕辦理庶務大公至正輕重務期得中過猶不及皆所不取此案無庸再行辦理富勒渾毛輝祖俱著申飭○諭軍機大臣等富勒渾奏陳安兆妄著書籍一摺所見頗屬過當富勒渾以藩司擢用巡撫朕之所望於伊者謂當實心報效不負委任以承受恩澤耳向來外省督撫陋習相沿模稜闕冗不思爲地方整頓徒博寬厚虛名朕從不稍爲假借若急於任事而不顧輕重有心從刻流於苛細何以得事理之平巡撫膺封疆重任通省吏治所關非藩臬贊理者可比從前 皇考時因外省錮習亟欲激清諸臣中卽偶有一二從事搏擊者乃補偏裒弊不得已之苦衷操縱自在聖心也朕臨御二十餘年以來事事執中持正從不令諸臣稍有偏倚富勒渾前已寄諭訓示令其諸事審量不可稍存成見冀其

辦事妥協之中力矯瑣細苛求之病今閱陳安兆之事尙不免立意從嚴已明降諭旨飭行再詳悉傳諭富勒渾知之○撥部帑六十萬兩於安徽備用○以蘇爾德爲安徽按察使由郎中遷○是歲朝鮮暹羅琉球來貢